

宋學士全集

一〇



貴州省圖書館
中文書

宋學士全集

(十)

J
17.8
1.2119

宋濂撰

宋學士全集卷之十七

碑

敕賜銀青榮祿大夫上柱國中書平章軍國重事兼太子少保鄂國常公贈翊運推誠宣德靖遠功

臣開府儀同三司上柱國太保中書右丞相追封開平王諡忠武神道碑銘有序

洪武二年己酉秋七月七日。銀青榮祿大夫上柱國中書平章軍國重事兼太子少保鄂國常公。薨於軍中。二十三日。計聞。皇帝爲之震悼罷朝。在廷之臣。莫不灑泣。越明日。詔中書定議。贈翊運推誠宣德靖遠功臣開府儀同三司上柱國太保中書右丞相。追封開平王。諡曰忠武。八月朔日。柩車至龍江。上往臨奠。慟哭而還。親爲擇地於鍾山草堂之原。營建宅兆。及棲靈之祠。凡百須之具。一給于官。不以煩其家。至冬十月九日。始葬。復推恩及其三代。皆爲王爵。生榮死哀。可謂至矣。上猶念其功不置。召臣濂於庭。而謂之曰。朕東撫高麗。西抵吐蕃。北際沙漠。南來交趾。占城。莫不稽首奉命。計其開拓之功。以十分而言。王蓋居其七八。朕今手錄戰伐次第。以授爾。尙爲文勒諸豐碑。以著王之功於無窮焉。臣濂受詔而退。謹再拜序而銘諸幽。王諱遇春。姓常氏。濠州懷遠人。世爲農家。賦性剛毅。膂力絕人。歲壬辰。羣雄並起。江淮爲之鼎沸。時王年二十有三。爲羣盜劉聚所得。聚覩王狀貌奇偉。拔於行伍。而信任之。王每出戰。必鼓勇爭先。聚深喜之。王察聚所爲。終不能有成。欲擇所依。乙未。聞上駐兵和州。領衆數十人。棄聚來歸。居兩月餘。請爲

前部先鋒。上曰：爾之來者，爲士卒糧絕，故就食耳。爾自有主，我安得而留之？王請之再三，至於涕泣。上曰：爾姑從吾渡江，俟克太平，委身事吾，未晚也。夏六月，上先抵采石磯，元兵陣於磯上，而磯下巨舟如織，相距僅三丈餘，猝難登岸。王乘快舸，相繼而至。上麾之使前，王卽捨舟，挺戈先登，衆皆披靡，遂拔采石，乘勝取太平。從上守禦，乃始授總管府先鋒。冬十月，陞管軍總管。丙申春二月，元中丞蠻子海牙復以兵屯采石，南北不通。上慮將士雖渡江，而其父母妻孥尙留淮西，勢莫可致命。王統兵攻之，王至設疑兵，以分其勢，而以正兵與之合，及戰，別出奇兵擣敗之，悉俘其精銳。自是元兵扼江之勢衰矣。尋守溧陽，攻建康，功爲諸將先。三月，從今大將軍右丞相徐公達克鎮江。夏四月，授承信校尉領軍先鋒。秋九月，再攻常州，會青軍叛去，與僞吳張士誠合。徐公被圍于牛塘，王與諸將力戰，大敗其衆，擒士誠梟將張將軍。冬十有一月，除統軍大元帥。丁酉春三月，遂克常州，遷中翼大元帥。夏四月，從徐公下寧國。秋八月，克馬馱沙。冬十月，取池州。戊戌春，擢江南行中書省都督馬步水軍大元帥。冬十有二月，上親取婺州。己亥夏四月，轉鎮國上將軍，同僉書江南等處行樞密院事，守婺城，尋命攻衢州，降之。冬十月，陞僉院。十有二月，攻杭州。庚子夏五月，召還京師。從徐公拔安慶，趙普勝之水寨，時僞漢陳友諒揚言援安慶，王策其必攻池州，以羸弱守城，伏銳士於九華山。明日，友諒兵果來攻城，伏兵四合，俘殺萬餘人。六月，友諒入太平，犯龍灣，王共謀擊敗之。已而上整舟師，襲友諒，留王守京師，軍民無敢譁。辛丑春三月，拜江南行中書省參知政事。秋七月，從上取安慶，破江州，回守龍灣。冬十有一月，張士誠出兵寇長興，上時駐九江，聞報還京師，命王往。

援士誠兵敗。俘殺五千餘人。壬寅春。修安慶城。羅友賢搆亂。據池州神山寨。將與士誠通。杭欽震動。冬。王往攻之。癸卯春正月。擒斬羅友賢。餘黨悉平。三月。張士誠遣兵圍劉福通于安豐。王從上擊之。將戰。王突入其陣。三戰三勝。敵兵大敗而去。俘獲士馬無算。遂同徐公圍廬州。凡三月。城將下。適陳友諒攻南昌。王解圍而還。秋七月。從上率諸將往援。八月。遇友諒于彭蠡湖之康郎山。王與之聯舟大戰。呼聲動天地。無不一當百。縱火焚僞平章舟。風急火熾。十里之間。湖水盡赤。敵將張定邊。素號梟猛。奮前迎戰。王射之。定邊中矢走。友諒乃退保鞋山。諸將以友諒兵尙強。請縱其去。王獨不言。及我師出湖口。皆言江流湍急。欲放舟而下。上知其情。命以舟扼上流。王應之。諸將乃遡流而上。舟蔽江面。控湖口者旬有五日。友諒軍食乏。出江求戰。王遣火舟火筏禦之。敵兵奔潰。追北數十里。與之酣戰。自辰至未不解。上所乘舟及王舟皆膠於沙。王旣脫御舟。而已舟被圍。復力戰而脫。于是友諒中流矢死。士卒十萬皆降。未幾。其臣立友諒之子理于武昌。冬十月。王帥師討之。四面合圍。甲辰春二月。理銜壁出降。荆湖之地。望風皆附。陸中書平章政事。秋七月。從徐公取廬州。八月。遂自將兵平臨江之沙坑麻嶺十洞牛陂諸寨。進取贛州。乙巳春正月。克之。悉定南安南雄韶州。夏五月。還兵取安陸襄陽。冬十月。從徐公克泰州。丙午春三月。復從克高郵。夏四月。淮安濠泗徐宿安豐皆下。秋八月。諸將攻浙西。師次太湖。僞萬戶尹義等逆戰。王擒之。直趨湖州之毗山。與敵兵水陸鏖戰。敵兵大潰。遂抵城下。塞其四門。晝夜環攻之。僞丞相張士信悉發境中兵爲援。屯于舊館。出我師之背。王統奇兵。由大全港入。結營東阡。復出敵背。且填壅溝港。絕其歸路。士誠知事急。出

親兵拒鬪。王一鼓勝之。士誠復遣其將徐義統赤龍船親軍來援。王復擊敗于烏鎮。冬十月。舊館降。得兵六萬。十有一月。湖州亦下。遂進圍平江。丁未。圍之益急。士誠收合餘燼。猶背城百戰。降其將士且盡。秋九月。始克之。縛士誠來獻。籍其兵二十有五萬。乃加授中書平章軍國重事。疏封鄂國進爵上公。冬十月。復授征討副將軍。同徐公奉命北伐。戊申。春正月上。卽皇帝位。立國建號。改元洪武。王與徐公下山東諸郡。遂攻汴梁。守臣李景昌遁。進攻河南。敵兵五萬屯于洛水之北。將出迎戰。王布陣旣定。單騎執弓矢。衝入其隊。敵發二十騎攢槊刺王。王一箭中其前鋒。大呼殺入。悉獲其衆。而河南諸城先後皆平。上幸汴京。謀取燕都。秋七月。徐公與王渡大河。河北諸郡又平。八月二日。燕都不戰而克。元君北奔。師次太原。其守將擴廓帖木兒帥衆來禦。其鋒銳甚。王與徐公謀曰。我騎兵雖集。而步卒未至。何以能戰。莫若遣精騎夜劫其營。其衆可亂。衆亂。主將可縛也。徐公如王言。擴廓帖木兒果中傷而遁。己酉。春正月。進攻大同。竹貞棄城走。河東又平。遂西入秦。張良弼遁。李思齊迎降。奉元鳳翔鞏昌臨洮又平。夏五月。元將也速迭兒侵通州。有旨命王以所部軍東還。拒之。遂擣永平。過惠州。獲江文清士馬以千計。至大寧。也速迭兒破開平。元君又北奔。追至北河。俘其宗王三人及平章鼎住等。凡得軍士萬人。車萬兩。馬三千。牛五萬。全師還燕。次柳河川。得疾而薨。享年僅四十爾。王之爲人。守謙而不矜。有功而無過。運籌決勝之方。不學而能。其從大將軍東征西伐。而能遵守節制。及其自將兵。則所至無不克捷。由其智識明而材力雄。故施之各得其宜。嗚呼。若王者。可謂開國之殊勳者矣。王之曾太父四三府君。累贈銀青榮祿大夫柱國中書平章政事。追封開

平王諡莊簡妣張氏。追封開平王夫人。大父重五府君。累贈儀同三司上柱國少保中書平章政事。追封開平王。諡安穆。妣陳氏。追封開平王夫人。父六六府君。累贈開封儀同三司上柱國太保中書右丞相。追封開平王。諡靖懿。妣高氏。追封開平王夫人。妻定遠藍氏。封開平王夫人。子男三人。曰茂。曰昇。曰森。皆上所賜名。女三人。長許爲皇太子妃。餘皆幼。臣濂聞之。昔日唐太宗起義兵而定天下。當時有尉遲恭者。棄劉武周仗劍來從。其後輔成唐業。而恭之功爲多。於是生有鄂國之封。歿有忠武之諡。今王之功。非恭所可及。上之所以遇王者。封諡與之雖同。而其王爵之加。恩數優渥。揆之於唐。誠又過之。史臣所謂君臣相遇千載一時者。豈不異世而同符也哉。是宜銘諸貞石。傳之千萬世。一以昭聖天子垂念功臣如此之至。一以著王之勳烈於不朽云爾。銘曰。

聖皇開天。豪傑四從。龍興而雲。虎嘯而風。義旗所指。山嶽震動。馳騁靈春。孰不神竦。維忠武王。其氣至剛。杖劍來從。飛渡大江。無堅不摧。無敵不碎。席卷長驅。易如拾芥。平吳定越。帖荆撫淮。威聲所加。小大畢來。齊魯旣寧。汴洛亦定。直指幽燕。不戰而勝。元君遠逝。六軍倒戈。本根旣撥。何有條柯。乃收晉翼。乃清秦隴。乃徇遼海。人百其勇。茫茫朔漠。灤河所經。誓將剗滌。邊塵弗驚。王之忠精。上貫天日。煜其有光。亘古不沒。幅員之廣。漢唐莫過。馬蹄所及。王功爲多。十五年間。百戰百捷。備殫勤勞。光輔帝業。翊運之勳。靖遠之威。在古或罕。於今見之。大功垂成。王忽長逝。當宁興哀。如失一臂。爰加恩寵。用錫王封。袞衣繡裳。照耀泉宮。天子曰噫。未慊朕志。其推爾爵。上褒三世。死生哀榮。孰可比焉。王雖云歿。生氣凜然。鍾山之陰。隧道有石。

詞臣勒銘垂示千億。

敕賜榮祿大夫同知大都督府事兼太子右率府使贈推忠翊運宣力懷遠功臣光祿大夫湖廣等

處行中書省平章政事柱國追封蘄國公諡武義康公神道碑銘有序

皇帝卽位之三載混一華夏聲教所被罔間遐邇梯山航海奉贄獻琛上念熊羆之士不二心之臣東征西伐宣勞有年方將胙土分茅以定功賞而都督康公薨於陝州上聞之嗟悼不已旣敕有司穿土作室以寧體魄復欲昭其功勳於悠久詔翰林學士臣宋濂稽諸簡牘所書文於堅石以垂示於億萬載臣濂謹按公諱茂才字壽卿康其姓也世爲蘄州人曾祖文廣皇贈中奉大夫中書參知政事護國追封京兆郡公祖德懋皇贈資善大夫中書右丞上護軍追封京兆郡公父壽皇贈榮祿大夫同知大都督府事柱國追封蘄國公母蕭氏追封蘄國夫人公當元之季四方雲擾未幾蘄州陷公結義旅以捍蔽爲務授以長官俄遷爲鎮府同諸將復九江擣蘄水黃連寨轉蘄州路同知總管府事屯戍和之裕溪太平之采石使者考其功狀陞淮西宣慰副使同知元帥府事又陞宣慰使都元帥歲乙未六月上帥師渡江將士家屬尙留於和州上盧公扼采石之衝弗獲渡時出兵挑戰公兵雖寡而以寬弘得士卒心故臨陣人多效死於是數戰不克後數月常忠武王遇春遣遊兵虛撓之公連日發軍以應王度其力疲夜設伏兵質明殲其精銳殆盡然猶收合潰散堅寨於天寧洲明年二月上命諸將以襄陽大砲破其寨公奔行臺便宜陞淮南行省參知政事甫踰月上亦克金陵又奔京口舟師追及之公度天命有歸乃率所部餘兵三千

解甲來附。免冠頓首。言前日戰。各爲其主。今日屢敗。天數也。事至於此。死生唯命。苟得生全。尙竭犬馬之力。以圖報效。上笑而釋之。仍許統所部兵從征。又明年。授秦淮翼水軍元帥。守禦龍灣。取江陰之馬馱沙。八月。僞吳張士誠犯我疆境。公驅兵逐之。獲其樓船。上賜名馬一疋。黃金一錠。歲戊戌。從廖楚公安攻池州。取趙雙刀之權陽。遷都水營田。使兼帳前總制親兵左副指揮使。明年八月。攻皖城。僞將率樓船出戰。公復獲之。又明年六月。僞漢陳友諒傾國入寇。攻陷我姑孰。殺戮我吏民。意將窺我南京。上召公謂曰。爾不疑我乎。公復頓首謝。上曰。汝旣不相疑。宜作書遣使僞降友諒。爲內應。招之速來。仍給告以虛實。使分兵三道。以弱其勢。友諒果如所言。暨至。諸將同公奮擊。大破之。縛其士卒二萬。有幣帛白金之賜。歲辛丑八月。上怒友諒來寇。率將士親征。公領舟師行擊安慶。破江州。僞都友諒西遁。遂下蘄州。興國。漢陽。公沿流而下。克黃梅某家寨。十一月。取江之瑞昌。敗友諒八陣。指揮友諒之勢遂衰。遷帳前親兵副都指揮使。明年九月。復龍興。又明年。攻左君弼於廬州。四月。友諒圍龍興。上親往援。公與諸將皆從。友諒聞上至。亟解圍還。七月。大戰於彭蠡湖。軍聲嘯呼。湖水爲之起立。浮屍蠢蠢動。至數十里。友諒遂至敗亡。又有幣帛之賜。十月。上親征武昌。公從之。歲甲辰二月。下之。友諒之子理銜壁出降。三月。進金吾侍衛親軍都護府副都護。四月。從大將軍徐公達游攻廬州。七月。下之。八月。拔安豐。繼取江陵及湖南諸州。加賜幣帛。明年二月。改神武衛指揮使。五月。進大都督府副使。閏十月。士誠兵犯江陰。京口。上帥大軍水陸並進。公在行中。及至鎮江。士誠兵已遁。又明年正月。追至巫子門。擊敗其衆。獲士卒三千。公功爲尤多。四月。搗淮安。

之馬邏港拔其水寨。復獲士卒與燔燼無算。淮安平。七月。遂攻湖州。十一月。破之。進逼姑蘇。姑蘇士誠僞都。卽遣銳卒來迎鬪。大戰尹山橋。公持戟督戰。益力。銳卒盡覆。乃進圍齊門。刀劍林立。飛鳥不敢下。大將軍命諸將合攻之。吳元年九月。姑蘇平。公取無錫州。十月。陞同知大都督府事兼太子右率府使。進階榮祿大夫。洪武元年。上以江南之地。旣入版圖。乃遣大將軍經略中原。公從定齊魯之地。復由黃河取汴梁。下洛陽。駐師陝州。規運饋餉。造浮橋以渡大軍。鎮河中。善撫綏。遺民爲之立石頌德。絳。解二州。則公所招徠。蔽遮潼關。秦人不敢東向。二年。復從大將軍征漢中。奉詔還軍。中道因疾而薨。實八月之三日也。年五十有七。上下羣臣議。贈公推忠翊運宣力懷遠功臣。光祿大夫。湖廣等處行中書省平章政事。柱國。追封。斬國公。諡曰武義。卜以九月二十一日。葬於應天府上元縣鍾山鄉之幕府山。上親臨奠。而百司繼之。祭幄相望。聯絡原野。時人以爲榮。公娶方氏。追封斬國夫人。繼室田氏。封斬國夫人。側室朱氏。余氏。子男三人。鐸。田氏出。鑑。朱氏出。鎮。余氏出。公通經史大義。事太夫人以孝聞。輕財仗義。意氣磊落。而尤有志於事功。值元祚將終。其才弗克盡施。然而真主龍飛於羣雄之中。公卽能識之。卷甲韜戈。率衆臣附。坦然而不惑。可謂上知天命。下體人心者矣。由是昭被寵眷。倚之以心膂。用之爲爪牙。十餘年間。屢從征討。茂績奇勳。著稱當世。存則安富尊榮。加以爵位。薨則疏封賜諡。賁及九泉。令名垂於竹帛。重祿延於子孫。公其可以不朽矣。臣濂謹拜手稽首。述辭於碑。系之以銘。深懼不足以稱上報功之意。銘曰。

於赫聖明。受命於天。如日之升。照於八埏。其一於時康公。江險之恃。大軍西來。視如平地。其二巨礮轟雷。物莫

敢櫻。何戰弗潰。何守弗傾。其三天人攸歸。勢何敢抗。知幾先來。率衆內嚮。其四皇帝曰嘻。有附匪疏。予開誠心。遇爾不疑。其五爾礪矛鋌。爾部士卒。助予四方。以寧萬國。其六公拜稽首。賜死爲生。誓殫報効。如無餘齡。其七孰不爲庭。率師往討。矯如翼如。風馳電掃。其八東吳西楚。蹴陳駕張。身經百戰。兇豎始亡。其九大將北伐。同取汴洛。出鎮於蒲。恤其孤弱。其十蔽遮河潼。以義爲關。誰敢操戈。睥睨其間。其十一介龜負碑。以頌遺愛。民亦何心。恩義斯在。其十二從伐漢中。迢迢西征。有命班師。中道而薨。其十三帝念將臣。血戰之苦。將酬其勳。錫以茅土。其十四孰不壽考。以樂承平。公胡嬰疾。隕魄泉扃。其十五帝情憫悼。恩命絡繹。穿山爲堂。畢茲窀穸。其十六名垂於史。祿延於家。翩然而逝。公復何嗟。其十七史臣造文。大書深刻。以昭公勳。有永無極。其十八

敕賜故懷遠大將軍僉江南等處行樞密院事贈榮祿大夫江西等處行中書省平章政事上柱國

追封梁國公趙公神道碑銘有序

故懷遠大將軍僉江南等處行樞密院事趙公之薨。距今已十寒暑。褒卹雖頒。而墓隧之碑未樹。其子懷遠將軍同知金吾右衛親軍指揮使司事獻。請於大都督府。移文中書。中書下其事禮部。於是尙書臣凱。侍郎臣魯。具以事聞。上可其奏。詔臣濂撰文。而臣某書篆以賜之。臣濂等受命震惕。深懼不足以稱上意。退考諸功狀而序之。曰。公初諱某。今改賜德勝。姓趙氏。濠之鍾離人。曾大父小乙府君。妣時氏。大父省二府君。妣王氏。父諱仁。贈懷遠大將軍同知指揮使司事。輕車都尉。追封天水郡侯。妣李氏。封天水郡夫人。公世爲良農家。狀貌魁偉。有膂力。尤能馬上運槊。捷疾如飛。人不敢猝近。歲壬辰。江淮倭擾。州縣簡拔。梟

銳爲義兵。奇公勇悍。選爲羣隊長。公年甫二十有八。帥衆接戰。必操螯弧以爭先。蹈湯赴火。有不暇卹。敵人望而畏之。然棲棲在下列。無有旌其能功者。乃走西營。謁歸德王忙哥。隸麾下。稍久。察其馭軍無律。絕類兒戲。又欲擇豪傑而依之。俛俛未有所歸。歲甲午。我朝皇帝統領大將南征。駐軍滌陽。公聞母夫人在軍中。秋七月戊寅。遂棄其妻來從。及見上。轅門喜。獲騎將。遂賜以今名。命爲帳前先鋒。已而從上取鐵佛岡。攻三汊河口。破張家寨。克金椒。後河六丈大樹諸寨。尋出師援六合。左股爲流矢所中。幾至危殆。上親臨視焉。歲乙未之春。閏正月。剗鷄籠山羣盜。與僞將韓溥酣戰。直搗烏江。下和州。而含山次第平。三月。夜襲陳也先營。戊申也先來侵。力出鬪卻之。夏四月庚申。拔板門寨。五月。擊長官寨。遂取儀真。上錄公從戰之功。超授忠勇校尉管軍總管府先鋒。六月丙辰。復從上渡大江。時元兵屯牛渚。劍槩如林。常忠武王鼓勇先登。而奪其營。諸將乃下太平。連攻蕪湖。句容。取之。秋七月辛卯。克溧水。八月。破溧陽。公皆有功。歲丙申。春二月。元將蠻子海牙闕大兵南渡。擁兵建柵於采石磯。以斷淮西之路。時將士家屬皆留淮西。上慮其心動。洊命忠武王帥師攻之。公亦在遣中。乃以疑兵分其勢。然後出正兵與戰。短戈方接。奇兵遽起。而乘之。元將大敗而遁。三月乙酉。大破陳也先營於方山。庚寅。下金陵。公之績爲諸將先。丁酉。上命徐魏公取鎮江。公副之。破苗獠軍水寨。夏四月。下丹陽。金壇。五月。平宣城。兵鋒所及。勢如破竹。而所向無前矣。轉承信校尉。領軍先鋒。六月。取廣德。秋七月。破僞吳張士誠水寨。九月。復從忠武王攻毗陵。會清軍叛。與士誠合圍魏公於牛塘。王與公大敗其衆。擒其梟將張將軍。歲丁酉。春三月壬午。取毗陵。時豪傑雄爭。而民

心無定向。會未幾。何廣德宜城叛。公復取之。夏六月戊辰。取江陰。秋七月丙子。攻常熟。張士德出挑戰。公麾兵而進。士德就縛。士德。士誠之弟也。遂征甘露。望亭。無錫諸寨。歲戊戌春二月。公從大將攻湖州。已而宜興叛。秋七月。公復取之。歲己亥夏四月。擢懷遠大將軍。中奕左副元帥。五月。攻池州。取青陽。石埭。當是時。安慶實爲荆楚咽喉之地。勢不得不取。秋八月。公攻之。已而取無爲。潛山。冬十有二月。復從大將征杭州。歲庚子春三月。還南京。會僞將朱暹來攻宜興。公帥師爲援。即搗退之。夏五月。僞漢主陳友諒以重兵襲我太平境。直犯龍江。皇上震怒。命諸大將分據險要。授以成算。而命公守虎口城。虎口城。龍江第一關也。旣而友諒兵大至。兵陣旣交。殺傷相當。而伏兵忽起山坳。友諒兵大敗。擒戮無算。遂復太平。秋八月。下銅陵之臨山寨。冬十月。掠黃橋及馬馱沙。歲辛丑春二月。征高郵。夏四月。陞後奕統兵元帥。秋八月。上親率六師伐僞漢。以報龍江之役。公從行道經安慶。攻破其水寨。遂乘風直泝小孤山。抵九江。九江。僞漢都也。距九江五里所。友諒始知。意謂神兵自天而下。友諒宵遁。遂克九江。獲其玉研華。蓋日月旗等物。公復分兵攻黃梅。廣濟。冬十月。克瑞。富。臨江。吉安諸州。復回師攻安慶。下之。十有一月壬申。進克撫州。友諒旣遁。謀移都武昌。公承命攻其沌口壩。歲壬寅春正月。從上征南昌。兵至彭蠡湖。南昌降。三月。取新淦州。已而祝某康。秦據南昌叛。殺守臣葉琛。公率精甲從魏公復其城。夏四月甲午。城破。公左肩爲砲所傷。久之乃瘳。上壯其爲人。超授僉江南等處行樞密院事。羅友賢據池州山寨以叛。冬十有一月。公與忠武王平之。僞漢餘黨建柵南昌之西山。號爲八陣指揮。十有二月。公從趙將軍破之。俘獲三千餘人。江右州郡

雖已附。往往觀望狐疑。未卽決。歲癸卯春三月。臨江吉安富州三城叛。公皆先後統兵復之。上以南昌實西江重鎮。襟江帶湖。控荆引粵。非宗藩不足以授綬定之。寄於是。詔皇姪大都督。授以節鉞。往蒞其地。而公實統精兵受節制。夏四月壬戌。友諒帥強兵十萬。攻圍南昌。癸亥。公統步卒數千。闢城門迎戰。僞將金指揮操戟直前。公彎弧一發。應弦而仆。敵氣大挫而退。明日復合。自是晝夜環攻城。友諒親督促之。勢在必取。公贊畫祕計。分命諸將隨方應敵。剪獲甚衆。六月辛亥。公巡城至東門。敵發礮張中其腰。臂箭深入約六寸。公卽拔出之。且撫脾歎曰。吾自壯歲從軍。傷於矢石屢矣。其重無踰於此者。豈命也夫。然大丈夫死卽死耳。復何憾。所恨者不能從主上掃清中原。稍效微勳。垂名於竹帛爾。丁巳。遂薨於私第。年三十有九。軍中涕泣相弔。上聞之。悼惜不已。遣使者來致祭。冬十有一月。獻護柩車至南京。以丙子葬於牛首山安德鄉下堡之原。上念其功。復命日謁者。賻以布帛菽粟有差。歲甲辰春三月。遂命獻代領其衆。秋九月。下中書議。贈公榮祿大江西等處行中書省平章政事。上柱國。追封梁國公。敕有司建廟南昌。歲時祭享。歲戊申正月乙亥。上卽皇帝位。始定國號。建元洪武。追念開國元勳。皆命配享仁祖。高皇帝廟廷。公位居其八。實異數也。公爲人沈鷲而簡默。剛明而質直。馭下嚴肅。一號令之加。旗幟爲之改色。是以戰無不勝。攻無不下。及從大將征伐。尤能恪守軍令。不敢違尺寸。君子以此多之。生平雖未嘗讀書。隨機應變。其智如神。動與古名將合。兼之臨難不懼。奮弗顧身。而於孝友之道。尤爲篤至。信所謂間氣所生之良將也。公娶王氏。因公來歸。歿於軍。追贈梁國夫人。繼室朱氏。先公若干年卒。子男一人。獻。王氏出也。臣聞之。

龍蛇起蟄。山澤通氣。與運相值。有開必先。此古今通義也。惟我皇上。龍飛臨濠。建萬世不拔之基。一時將帥大臣。多其鄉里之豪俊。如公者。亦一人也。蓋昊天有成命。既生聰明。睿知爲天下君。必有賢臣。經綸而翼衛之。此意已定於冥冥之中久矣。公自壯歲從戎。何役不隨。何戰不與。所以輝耀其威靈者。亦云至矣。使假之以年。勳業炳朗。當不止於斯。惜乎不見海嶽大歸於一統也。其亦命也夫。然而聖恩沛滂。追命錫爵。旣備極於寵榮。有子能久。亦足上承宸渥。宿衛殿庭。公之不沒者。蓋有在矣。古者諸侯計功稱伐。書之於太常。勒之於彝鼎。以示其不忘。是用上遵詔旨。備書公之勳績。繫之頌聲。以昭示承休於豐碑焉。頌曰。洸洸將軍。川嶽之英。捷如俊鷹。金瞳鐵翎。臨風一擊。百禽震驚。當元季世。四海雄吞。續紛戰塵。白晝翳昏。執戈而興。擊風躍雲。真人龍飛。屆滌之陽。單騎來歸。願備戎行。帝曰俞哉。羣慝爾壞。元有將臣。牛渚駐師。公揚靈旗。隨帝殄夷。拔其水營。雲散鳥飛。於時羣豪。割邑據都。伐木建柵。壅川爲瀦。視帝指呼。有剪是屠。孰爲最強。犬牙其中。僞漢居西。狂吳在東。登我叛人。軼我疆封。無征弗從。有戰必先。斬將擐旗。電逝颺旋。敵人畏之。縮頸莫前。何彼凶殘。犯我龍灣。公扼虎口。屹爲雄關。六軍奮呼。殺人如山。帝乃誕怒。肆行天誅。公時在行。勇若虎貔。俘厥寶玉。僞都爲墟。胡不爾思。復攻豫章。恃其冰山。以凌太陽。公亟出遏。殪彼豺狼。堂堂晝巡。出其東門。不虞飛矢。竟斃其身。軍中慟哭。於夜亦聞。天祐我朝。實生俊英。珣戈淑旂。統馭萬兵。胡命止斯。不觀厥成。天聲四震。漢路吳摧。中原旣定。外邦畢來。使公之存。績用益恢。天子念功。禮備褒旌。錫爵上公。配享廟庭。命書絢爛。榮賁泉城。牛首之山。有墓在原。禮官奉詔。表此武勳。以鴻厥慶。以示子孫。

敕賜開國輔運推誠宣力武臣榮祿大夫柱國廣德侯加贈特進榮祿大夫右柱國進封巢國公諡武莊華公神道碑銘

自古興王之際。天既生真人。拯民塗炭之中。必有如虎之將。弘展其不猷。弼成其大業。此如燭照而龜卜。蓋無疑者。以漢唐言之。則雲臺二十八將。凌烟閣二十四人是已。洪惟皇帝當四海逐鹿之秋。龍飛淮甸。噓陽吸陰。反掌之間。廓清八極。遠荒蠻徼。罔不臣妾。當是時。謀臣猛士。效忠宣力。其衆如雲。若和陽華公。亦其一人也。歟。公諱高。姓華氏。字則未聞。所謂和陽。則其所居之郡也。曾大父汝德。贈中奉大夫湖廣等處行中書省參知政事護軍。追封武陵郡公。曾祖妣張氏。追封武陵郡夫人。大父某。贈資善大夫湖廣等處行中書省左丞上護軍。追封武陵郡公。祖妣張氏。追封武陵郡夫人。父德新。贈榮祿大夫湖廣等處行中書省平章政事柱國。追封灃國公。妣童氏。追封灃國夫人。公之生也。挺然有英氣。人見之者。咸曰。是子異日必亢厥宗。及壯。其材果超羣類。不屑屈人下。同黨多嚴憚之。至正中。天下大亂。所在寇盜。乘時爲患。害屠劉其黔黎。蕩析其室廬。剽斂其玉帛。公慮蹙迫州境。卽於所居黃墩結集水砦。召募強丁。淬礪刀劍。晝夜爲禦侮計。練閱有法。暗合古之將略。遐邇聞者。多荷戈相從。於時帝初起兵臨濠。智勇之士雷動而霧集。公遂帥衆而來。隸於麾下。及大兵飛渡長江。進克采石。繼攻蕪湖。駐溧水而定建業。擣京口而下江陰。公皆從。諸將建立奇勛。會張士誠據有淮浙數州之地。肆爲不恭。侵軼邊陲。帝乃震怒。遣大將出師討之。公復在行。摧敵於舊館。陷城於姑蘇。拓土於淮東。其功號爲尤偉。蓋公自從軍。授以先鋒之職。八轉至

榮祿大夫湖廣等處行中書省平章政事。迨夫大統既集，帝念將帥百戰之勞，定功行賞。上則公爵，次則侯封，各錫以鐵券金書，傳示子孫，俾世其祿。於是授公開國輔運推誠宣力武臣，榮祿大夫柱國，封廣德侯，食祿六百石。公未及受券，請命往廣海巡視城陣，整飭軍隊，行次崖州，以疾薨於官舍。年五十有九。實洪武四年三月二十七日也。訃聞，帝懷悼不已，詔有司迎公之柩，以是歲六月某日，還葬於黃墩先墓之次。藏券墓中，以慰公於九泉。且進封集國公，諡曰武莊。階加特進，勳加右柱國，褒崇之意，無不備至。公一子景春，蚤世，竟無嗣續。其配豐國夫人蔣氏先薨，至是與公合葬焉。既葬，禮部以聞，帝若曰：「其令國子司業宋濂製爲碑銘，樹諸神道。」尙書臣陶凱卽日傳命授臣，臣不敢辭。臣聞傳記所稱用世之士，非才勇爲難，而炳於幾先者爲難。公當羣雄疊奮之時，亦欲以扞障自效，見帝之頃，卽知天位之有在，人情之所屬，統其部曲，驩然來歸，非有先幾之識者能之乎？其建樹功烈，安享尊榮，爵封上公，位躋極品，亦宜也。雲臺濩烟之衆，又豈得專美於前乎？臣旣歷序公之戰功次第於右，復繫之銘，辭曰：

士之所貴，炳於幾先。誠獲所依，身名兩全。當元之季，王綱解紐。羣雄虎爭，鹿知誰手。維武莊公，家於和陽。取水建砦，以遏寇攘。皇帝龍興，知爲眞主。仗劍相從，率先多士。帝曰：「俞哉！爾兵我從，卽麾義旗。」同渡大江。牛渚旣殲，蕪湖亦捷。溧水洋洋，視如一髮。天兵載揚，翔飈震霆。秣陵南徐，次第而平。況此江陰，勢如破竹。兵鋒所向，無強不颯。鄰有勅豎，據浙連淮。來撼大樹，何哉蚍蜉？叶皇赫斯怒，命將行伐。鏗破連營，洊除窟穴。復敕雄師，定淮之東。載綏載寧，載約其同。凡斯諸役，公無不與。展力據誠，亦云備至。天清地寧，六合一

家大統既定。論賞有差。黃金鑲書。鑄鐵爲券。作誓剖符。千齡弗變。皇恩下被。將膺寵榮。訃來海南。聞者涕零。宸衷憫惻。爲詔郡縣。旋其柩車。就鄉而窆。崇階峻爵。極於上公。龍光有赫。賁及幽宮。儒臣作銘。播揚嘉績。百世之下。視此貞刻。

元故嘉議大夫禮部尙書致仕贈資善大夫江泐等處行中書左丞上護軍追封譙國郡公諡文節汪先生神道碑銘

濂奉敕總修元史。凡忠義循吏之事。天下郡縣悉上史官。而宛陵汪先生獨闕。旣而先生族子克寬來與纂修。始以其門人汪文炳所撫事狀相示。濂旣命史官刪削立傳。克寬以爲史乃一代成書。其法當略。墓文乃私家所譏。其紀宜詳。復致其孫德屋之言。請濂揭銘於隧上。嗚呼。先生之德之盛。海內孰不知。而所識錢珍之獄。泰定實錄中嘗書之。其可不備載以昭示方來乎。先生諱澤民。字叔志。姓汪氏。其先新安歙縣人。自唐以來爲宦族。五季之初。兵馬使都虞候道安。始自歙遷婺源之還珠里。又歷八世。至宋天禧己未。進士祕書丞贈光祿少卿震。生慶歷。癸未。進士都官員外郎贈中大夫宗顏。都官生。皇祐壬辰。進士左奉議郎知漢陽縣贈少傅毅。又自婺源遷饒州德興之龍溪。少傅生贈通奉大夫槃。崇寧癸未。進士正義。大夫端明殿學士藻。藻以文學政事爲時名臣。通奉生紹聖丁丑。進士朝散大夫江西轉運使愷。知合肥縣。贈中散大夫慤。又自德興遷宣州之宣城。子孫遂爲宣城人。中散生紹興庚辰。進士通判隆興府鴻舉。鴻舉之弟修舉。則先生高祖也。曾祖諱宰臣。贈朝奉郎。祖諱夢雷。鴻祐。辛丑。進士。累官知靖州。元贈翰林

直學士亞中大夫輕車都尉。追封新安郡侯。父諱鼎新。用父廕補將仕郎。元贈嘉議大夫工部尙書上輕車都尉。追封新安郡侯。工部之兄鼎亨。景定壬戌進士官池州大軍酒庫。然自少卿至先生。奕世科名。蟬聯不絕。先生自幼融通經史。亦銳然思繼承之。會科目之法行。遂領延祐甲寅江浙鄉薦。上南宮不利。有司用恩例署寧國路儒學正。暨再舉。遂擢戊午進士第。授岳州路同知。平江州事。階承事郎。時先生之母譙國郡夫人王氏。春秋已高。先生以平江道遠。不可迎養。上書丞相府乞降一二階。就銓鄰州。不報。竟奉太夫人之官。州有健民白張。以利餌長吏。持其陰私。使不敢問。遂視閭井民若蠹虱。頤指氣使。輒奔走不暇。稍迁其意。卽繫送於官。人懼。呼爲張雷公。先生曰。弗治。我民將無生。卽發其姦。屏諸蠻荒。不使與良民齒。李氏有兄弟者三。素豐於貲。季弟未有子而歿。其婦傷季之天也。誓終身不再適。孟仲利其財。數設計。搆之。婦堅不動。乃嗾亡賴男子。誣以姦私。婦不禁撻掠。自引伏。先生見其色有冤。間行廉察之。悉得其情。白而出焉。轉承務郎。南安路總管府推官。戍將朶兒赤跋扈自用。搯有司之掣。俾不得誦信。其嫗家王某爲郡府史。藉其威。尤鴟張無忌。擅筆大庾縣令。縣令訴諸府。同官懼戍將之威。相視以目。無人發一辭。先生毅然捕王下獄。會監察御史行郡。戍將結以厚賂。御史召先生於庭。詰其獄狀。聲色俱厲。先生徐曰。王之姦賂。人所知也。御史欲屈法邪。御史慙。夜半馳馬去。王卒伏罪。居亡何。戍將以賊敗。部使者知其故。檄先生推讞杖罪之。廣州歲稔。民大饑。疫癘洊臻。死亡相枕藉。其毒氣所薰蒸。鮮有能生者。江西行中書屬先生行賑荒之政。先生絕無所畏懼。命大姓發廩以哺疴羸。其病癘方熾者。召醫注善藥。親走其廬給之。

活者數萬。先生暨從者亦無他虞。將還。送者謹曰：我父母也。奈何去之。馬擁不能前。潮州府判官錢珍挑推官梁楫妻劉氏不從。誣楫冒糴官中米。殺之獄中。事連海北。廉訪副使劉安仁逮繫者二百人。中書移問者凡六。各懷顧忌。事終不白。先生識之。獄立具。時珍已飲藥死。詔戮其屍。安仁坐受珍賂。除名。時朝廷遣奉使宣撫江西。聞先生名。命巡南安章貢二郡。事得專決。聲績尤著。擢承直郎。信州路總管府推官。丁內艱。不赴。服除。遷平江路總管府推官。階承德郎。初。浮屠甲與隣僧乙有隙。久不相周旋。衆約其輸平。乙因邀甲飲酒。至醉。遂寢其室。甲弟子沈安素苦甲鞭笞。且期速紹其業。幸甲宿於警。夜持刀往殺之。明日訴諸縣。乙虐於考訊。輒誣服。獄上。先生閱其刀。有鐵工氏名。召工驗焉。曰：此沈安刀也。逮安一訊。即承脫。乙械械之。嘉定地瀕海。朱管二姓爲姦利於海中。致貨鉅萬。及以他事敗。上下受其賂。莫敢捕。獄久不決。先生與總管道童公適至。徑縛以來。竟籍其家。及徵其帳歷。備列省憲郡邑受賂之數。惟先生及總管名下疏曰：不受。陸奉議大夫知濟寧路之兗州兼管本州諸軍。與魯勸農事。磁陽。負郭之縣也。孔子廟學久不建。先生以爲風教所繫。買地作之。殿堂門廡及齋序之屬。無不具。飭襲封衍聖公。職止三品。先生以宣尼之胄。不可以弗崇。上疏請增其秩。廷議聽之。奏陸品爲第二。錫以銀章。居一年。政化大行。絃誦之聲。周達乎西東。園扉之間。可設爵羅。嘉禾生於縣郊。瑞麥孕於泔水。君子謂有漢循吏之風焉。廉訪使者行部。將歷境。還曰：汪兗州在。吾可無往矣。至正癸未。詔修遼金宋三史。拜先生朝列大夫。國子司業。俾分修兵志及宋理宗本紀。史成。有上尊束帛之賜。已而除集賢直學士。太中大夫。未數月。亟上納祿之請。以嘉議

大夫禮部尙書致其事。先生既歸，僦屋以居。門生弟子援洛中諸賢故事，爲築室宛水之濱。先生日督諸孫讀書以自娛，不知其貧。歲壬辰，斬黃紅巾彭黨，祖構亂，其餘擊自徽寇宣州江東。部使者道童問策於先生，先生語以收人心，振士氣，築城浚濠，儲糧簡卒，凡數十事。寇再至，再擊退之。乙未夏六月，長槍叛帥瑣南班程述等挾兵渡江，欲犯宣城。城中兵不滿數百，或勸先生去之。民曰：「先生忠孝人也，天必相之。」當相與守城。若果去之，各屬亦隨之爾。部使者不入，沙周伯琦二公復申民言以爲請。先生曰：「昔江萬里寓鄱陽，大軍逼城，衆皆走散，獨坐守以爲民望。況宜民離合，視吾去留，吾何忍棄父母之邦乎？」時軍費不給，加以嚴刑弗之集。先生從容一言，獲鈔一萬錠，米二千斛，民心翕然，欲爲固守計。屢戰輒屢勝。八月丁丑，江浙行省參政吉尼哥兒遣兵來援，城內恃援至，戍守頗懈。是夜三鼓，長槍軍攀堞而上，城遂陷。戊寅，僞萬戶丁堅使前鋒葛義執先生逼降，不屈，遂遇害。將死，罵猶不絕口。瑣南班雅敬先生名，爲具棺衾，葬於某山之原，得壽八十有三。事上於朝，贈資善大夫江浙等處行中書省左丞上護軍，追封譙國郡公。下太常定諡曰文節云。先生娶戴氏，累封譙國郡夫人。先八年卒。子男二人，用敬以子貴，封敦武校尉常州路宜興州判官，用和國子生，辟充侍儀司舍人，不赴。兄弟痛憤不食，相繼卒。女一人，適劉士禮。孫男五人，德宣以蔭資補官，敦武校尉善盈，庫副使德屋，國子生曲阜，宣聖林，廟司樂德崇。癸巳鄉貢進士湖州路德清縣學教諭，德正，德進，孫女一人，適吳愈。曾孫男五人，禔源，傳源，鳳源，書源，清源。先生軀幹修聳，高準疎髯，風裁峻如也。其爲學本諸六經，真知實踐，無一不本於道義，其奉親也，丁工部公之憂，則三年獨處於

外弗御酒肉。每遇諱日。悲慟不自勝。至老不變。事母夫人。則板輿方舟。迎侍之官。熙熙承顏。惟恐少違其意。婺源三大墓。爲強家所侵。辨理於有司。經四十年。必復之。乃已。其事君也。一飯不敢忘懷。保小民甚如赤子。革弊除姦。有知殆無不爲。然於律已。則玉潔冰清。毫髮之私。又無自而入。故其至也。民戀愛之。其去也。民慕思之。至有爲生立祠者。嘗重構美章亭於堯。賊至。不忍焚之。且曰。此汪公遺澤也。嗚呼。不知先生何以能致於斯哉。由其立心之正。不爲勢利所誘。擇術之精。不爲不義所屈。忠孝大節。所以暴白於天下。揆古無讓。於今無媿。可謂不負於科目者矣。先生爲文。不事絺章繪句。而義理自足。詩亦清婉。有魏晉風。尤以善書名家。單紙片牘。人咸藏弄爲榮。所著書有巢深。燕山。宛陵三藁。傳之於學者。當寶與之歲。江南三行省。屢聘先生。司其文衡。士論尤服其精允。至今人道之不忘也。夫自壬辰之亂。四方瓦解。其能執節不回者。往往於學士大夫見之。如余闕之死於舒。李黼之死於江。秦不花之死於台。尤號傑然者也。有如先生。無城郭封疆之守。或保身於山澤。君子亦未必深議之。先生不以仕止爲間。孜孜汲汲。思衛斯民於危亡之際。遂及於難。非事君無二心者能之乎。使人人皆先生。若國家其有敗亡之禍乎。悲夫。系之以銘曰。

仁皇建科。璽書四布。濟濟多士。雲集川赴。猗歟汪公。游舉於鄉。對揚大庭。乃第奉常。筮仕遐邦。不遑將母。上疏廟堂。願從近授。孝聲載昭。如水東馳。公聞曰。噫。吾分之宜。鋤強擊貪。鷹隼橫鶩。去之弗亟。我民之靈。曷爲理官。爲獄立平。起彼朽骨。化而爲生。魯有名邦。特公爲政。瑞麥嘉禾。發爲祥應。策書載登。金匱啓封。

衰斧之寄。有詔倚公。尋教成均。六館咸悅。復直集賢。進班邇列。公曰。止哉。吾懸我車。秩宗之加。以華其歸。拄笏看山。宛水之浹。遭時艱屯。四郊多壘。氓之蚩蚩。非公疇依。公苟我留。執戟以隨。一鼓作氣。爭相奮躍。刈寇如麻。血污秋鏢。孰援我兵。夜柝不鳴。彼乘吾懈。遂無堅城。毒霧四塞。殺戮以逞。執公使降。白刃磨頸。嚼齒大罵。我實王官。咄哉賊奴。敢正之干。公雖遇害。之死弗屈。孤忠凜然。儼如出日。事聞中朝。當宁嘆嗟。節惠易名。恩寵有加。所貴君子。行爲民望。薄俗濶奔。障之東向。非孝無親。非忠無君。凡百在位。視公爲人。敕賜開國輔運推誠宣力武臣榮祿大夫柱國淮安侯華君神道碑銘

自古以來。人臣事君。始終一心。以上承明德。所以保勳烈於不刊。熙令譽於無窮。此丹書所謂敬勝怠者。吉是也。其或遭時擾攘。攀龍鱗而附鳳翼。自赴於功名之會。一旦封重爵。享厚祿。志益氣驕。唯欲之是從。遂致壞法亂政。蓋有其初而鮮克有終。此丹書所謂怠勝敬者。滅是也。嗚呼。敬怠之間。善惡之所由分。禍福之所由繫。臣某於淮安侯之事。不能無深感焉。侯諱雲龍。字某。姓華氏。安豐人。世爲農家。圖譜喪。不知其先世遷移之詳。三代皆以侯貴。累膺贈典。曾太父六二府君。中奉大夫北平等處行中書省參知政事。妣王氏夫人。大父七二府君。資善大夫北平等處行中書省左丞。妣韋氏夫人。考子中。榮祿大夫北平等處行中書省平章政事。妣陳氏夫人。侯生二十年。元季兵亂。挈家避難。俛俛無所之。皇帝龍興臨濠。四方豪傑。荷戈雲從。侯上謁轅門。命爲帳前小校。當是時。人心旣歸。踴躍用命。上帥大軍取濠州。元戍將遁去。和與滁接壤。聞之喪膽。繼復取之。遂大招舟師渡大江。太平父老。望旌旗迎降。侯後先從征。由千戶進鎮。

撫陞萬夫長。曾未幾。何上攻金陵。下之。侯擒元將李將軍。授總管之職。尋隨諸將取廣德。游擢統軍元帥。僞漢陳友諒據九江爲都。時侵我邊陲。歲庚子。傾國而東。陷姑熟。直犯我龍江。上授諸將方略。設伏於險。赤幟一揮。伏甲盡出。大敗僞漢兵。侯亦有功。戰功後三年。友諒弗悛舊惡。攻圍我江西。上親帥六師往討。友諒恐。退入彭蠡湖。與大軍遇。相持四十餘日。其大戰凡三。友諒受矢斃於舟中。龍江彭蠡二役。侯在行中。復以功陞豹韜衛指揮使。繼從伐荊州。又同征江北郡縣。而泰州高郵淮安次第平。轉淮安衛指揮使。就留鎮之。吳元年丁未。大將軍徐達奉詔征中原。侯復在行中。齊魯既定。河南之民。簞食壺漿以迎王師。暨入燕。元君棄都而逃。立北平等處行中書省。授侯鎮國上將軍。僉大都督府事。分府北平。拜資善大夫。燕王府左相兼北平行省參知政事。及天下大定。論功行賞。加開國輔運推誠宣力武臣之號。官榮祿大夫。勳柱國。爵封淮安侯。食祿一千五百石。前職如故。尋兼燕山衛都揮使。時北平新入職方。非勳舊大臣。不足以壓服之上。以侯爲鄰郡子。且恩遇之深。不翅骨肉至親。必能爲國宣力。故特託以方面重任。豈期侯昧於理。動違邦憲。據元丞相脫脫大第居之。凡元宮龍榻鳳榻及金玉寶器。非人臣可僭者。皆用之。弗疑已。而以其第高曠。苗害屢生。復役戰疲之士。創殘之民。唯新室是圖。奢麗過制。特甚。此猶可也。先是元故都破。其達官之女。多與我師爲婚媾。幼主尙竄沙漠。諜者因倚之偵我事情。上明照數千里外。屢勅中書移文北平。凡舊仕於元者。悉遣發江南。毋使爲民患害。侯皆廢格不行。及至征討。副將軍李文忠北征。獲間諜數人。始知故宦之家。有官兵馬司者。相率構姦。僞作文榜。欲爲變托姦人。以爲巡邏之職。將焉禦。

寇此非侯之過歟。上猶念其功，不忍真于法。趣中書諭其盡遣。侯仍弗之聽。上怒，詔內官往歷指其主名。諭之。侯始不得已，奉詔。侯自是益怠於政。日從事歌舞燕飲，遂得羸疾。疾寢劇，上召還南京。以洪武七年六月二十八日卒。享年四十又三。娶繆氏，累封淮安夫人。子二人。長曰忠，次曰關。住女一人。以七月十日葬京城之西石灰山之陽。上親御翰墨，製文一通，遣中官致奠焉。惟侯奮起戎行，出遇風人，乘六龍御天，從征四方，粗著勞效，初無獨建奇功，峻烈照耀人之耳目。然而封以大郡，錫之侯爵，寵恩之加，不爲不重矣。奈何靡思補報，狗欲敗度，絕無憂國恤民之心。乃知往古韓彭之流，怙功自專，卒至夷滅，皆其自取焉。爾所賴聖天子推天覆地載之量，保全功臣，唯恐有毫髮不至。故侯得令終於家，享榮名，歿世，豈非幸歟。故事生封侯者，沒必加之以公。於是敕止以侯禮，聊示薄罰。可謂仁之至，義之盡者也。臣濂奉敕撰神道之碑，稽諸天理之正，察乎人心之公，不敢用昔人誌墓常法，特取春秋直筆褒貶之義，勒文穹碑，以爲千萬世人臣之勸戒云。銘曰。

人臣事君兮，猶如事天。寅畏是將兮，終日乾乾。慎終如始兮，曷敢弗虔。一或怠逸兮，明命在前。侯起戎行兮，有力如虎。逢時釋騷兮，擇歸眞主。四征弗庭兮，無役弗與。斬將搃旗兮，所向披靡。帝用嘉錫兮，龍光日殷。疏以侯爵兮，作鎮北藩。兵民二柄兮，付之旬宣。鞠躬盡瘁兮，宜報國恩。胡昧爾心兮，動違國憲。僭侈是崇兮，羣生胥怨。峻宇雕牆兮，朝夕沈湎。是非倒置兮，大分莫辨。皇仁如天兮，覆之幬之。錄其助庸兮，恤之崇之。君恩固弘兮，臣行或虧。生弗爲善兮，死其忸怩。春秋直筆兮，善惡莫掩。萬世取法兮，納人於檢。墓門

有石兮可比琬琰。史臣勒文兮以示褒貶。

故資善大夫廣西等處行中書省左丞方公神道碑銘

洪武七年三月某日。資善大夫廣西等處行中書省左丞方公。歿於京師鍾山里之私第。既已襄事。而墓門之石。未有刻文。九年冬十一月。其子禮恐公羣行墮沒無傳。請於大都督府。移文中書。中書下禮部。於是尙書臣籌以其事聞。制曰。可。遂敕翰林學士承旨臣濂爲之銘。臣謹按留守都衛經歷天台詹鼎狀公之行曰。公諱珍。避廟諱更名真。因字谷貞。姓方氏。其系分自莆田。再遷台之仙居。三遷於黃巖。遂占籍焉。公長七尺。狀貌魁梧。而身白如瓠。有偉丈夫量。未嘗宿怨。識者已知其爲貴人。至正初。李大翁嘯衆倡亂。出入海島。劫斃漕運舟。殺使者。時承平日久。有司皆驚愕相視。捕索久不獲。因從而綏輯之。劇盜蔡亂頭。聞其事。謂國家不足畏。復效尤爲亂。勢鴟張甚。濱海子女玉帛。爲其所掠殆盡。民患苦之。中書參知政事。朶兒只班發郡縣兵討蔡寇。公之怨家誣搆與其通。逮繫甚急。公大恐。屢傾貲賄吏。尋捕如初。公度不能繼。且無以自白。謀於家曰。朝廷失政。統兵者玩寇。區區小醜。不能平。天下亂自此始。今酷吏藉之爲姦。媒孽及良民。吾若束手就斃。一家枉作泉下鬼。不若入海爲得計耳。咸欣然從之。郡縣無以塞命。安城齊民以爲公。民亡公所者。旬日得數千。久屯不解。朝臣察其非罪。奏爲慶元定海尉。使散衆各安其居。自時厥後。汝穎兵大起。海內鼎沸。齊國忠襄王李察罕保釐河洛晉冀。李思齊張思道號令關陝。陳友諒明玉真。分有江漢荆益。張士誠據淮瀾。公亦有慶元台溫三郡之地。同縣章子善者。好從橫之術。走說公曰。夷狄

無百年之運。元數將極。不待知者而後知。今豪傑並起。有分裂之勢。足下奮襦一呼。千百之舟。數十萬之衆。可立而待。沂江而上。則南北中絕。擅餽運之粟。舟師四出。則青徐遼海閩廣甌越。可傳檄而定。審能行此。人心有所屬。而伯業可成也。公曰。君言誠是。然智謀之士。不爲禍始。不爲福先。朝廷雖無道。猶可以延歲月。豪傑雖並起。智均力敵。然且莫若爲主。保境安民。以俟真人之出。斯吾志也。願君勿復言。子善謝去。公自是其官累遷至江瀾。行中書參知政事。會有詔徵兵討張士誠。公遂出師。士誠知公且至。遣其將史文炳。呂真統十將軍兵七萬禦公於崑山。崑山去姑蘇七十里。士誠之僞都在焉。文炳真陳兵城中。仍以步騎夾岸爲陣。士誠命游兵往來。旌旗數十里不絕。氣勢甚盛。公曰。濱海之地。非四達之衢。乃復參用步騎兵。雖衆不足畏也。公舟師僅五萬。身率壯士數百趨笏子橋。文炳真使十將軍薄水戰。矢石如雨。公戒其衆持葦席藉塗泥。冒矢石急奮。夾岸之軍以火箭亂射。公燎及鬚鬢。橫刀大呼而入。殺兩將軍及十餘人。軍大潰。若禽鳥散去。公與壯士追擊。趨其中堅。文炳真接戰。公出入陣中。所嚮輒披靡。橋左右水騎訖不得成列。而岸上軍又散。北文炳真棄馬走。亡七將軍。溺死者萬計。公乃次兵於岸。明日又戰。七戰七捷。直至城下。士誠得報。遣使者送款。請奉元正朔。公還。遂以節鉞鎮瀾東。開治於鄞。元之君臣多公之勳。復數加爵賞。俄至太尉。江浙行省左丞相。賜衢國公印章。昆弟子姓賓客。皆至大官。當是時。今上皇帝龍興臨濠。定鼎金陵。天戈所指。無不箠食壺漿。以迎王師。上親取婺州。而衢處相繼降。公曰。吾聞順天者昌。逆天者亡。今臨濠兵精甚。所至無堅城。此殆天命之所在也。逆天不祥。卽遣子完入侍。上喜曰。自古英雄以

義氣相許。當如青天白日。事成同享富貴。何以質子爲。遂使完歸。公復遣使者。願守城邑。如錢鏐故事。歲貢白金。以給軍費。上許之。然猶自海道輸粟元都。時羣雄力爭。上方勵志中原。公獨屏蔽江海。使者交於二境上。唯求庇民而已。苗軍劉震蔣英等叛婺州。殺首帥胡大海。持其首來曰。願隸麾下。衆皆賀。獨公不許。曰。吾昔遣使效錢鏐。言猶在耳。今納其叛人。是見小利而忘大信也。且人叛主而歸我。卽他日叛我。又安可必耶。遂帥師擊之。仲兄中流矢而沒。上遣使臨祭。且慰撫其遺孤。越數載。上詔大將軍徐魏公平姑蘇。縛士誠獻京師。公以久疾不視事。又幕府賓客無所陳說。失朝賀禮。上怒。大軍且壓鄞。公憂懼不知所爲。乃封府庫。具民數。使城守者出迎。躬挈妻孥。避去海上。使完奉表謝曰。臣聞天無所不覆。地無所不載。王者體天法地。於人無所不容。臣荷陛下覆載生成之德久矣。安敢自外於天地。敢一陳愚衷。惟陛下裁幸。臣本庸才。處乎季世。保境安民。非有黃屋左纛之念。曩者陛下霆擊雷掣之師。至於婺州。臣愚以爲天命有在。遣子入侍。於時固已知陛下有今日矣。所謂依日月之末光。望雨露之餘澤者也。而陛下開誠布公。賜手書。歸質子。俾守郡縣。如錢鏐故事。十年之間。與中吳角立。皆陛下之賜也。逮天兵下臨吳會。臣嘗上書。謂朝定杭越。則暮歸田里。不意今年以來。老病交攻。頓成昏昧。而弟兄子姪志慮不齊。致煩陛下與閭罪之師。方懷憂懼。未能自明。而大軍已至台溫。令臣計無所出。雖遣使再三。而承詔之師。勢不容已。是以封府庫。開城郭。以候王師之至。然猶未免爲浮海之計者。昔有孝子於其親也。遇小杖則受。大杖則走。臣之事適與相類。雖然。臣一介草莽。亦安敢自絕於天地。故每自思。欲面縛待罪闕廷。復恐陛下萬一

震雷霆之怒。天下後世議者。不謂臣得罪之深。將謂陛下不能容臣。豈不累天地之大德哉。謹昧死奉表以聞。俯伏候命。上覽表。趣公入覲。公至京師。上且喜且讓曰。若來何晚也。公卽叩首謝罪。上以公誠懇。遇之特厚。每賜宴饗。皆與功臣列坐。未幾。有廣西左丞之命。俾奉朝請。一日侍上燕。坐不能興。興至第。則成未疾矣。上數遣中使賜問。官其二子。禮宣武將軍僉廣洋衛親軍指揮使司事。完忠顯校尉虎賁衛千戶所鎮撫。令公得親見之。已而公疾革。上遣中使問所欲言。公指使者中坐良久曰。臣荷陛下厚恩。無尺寸之功。而子孫庸魯。絕不知人間事。臣所憂者獨此耳。幸陛下以臣故。曲加保全。則臣感恩九泉。爲犬馬報陛下矣。言畢而逝。壽五十有六。上聞哀。憫之。親御翰墨爲文。命官致祭。皇太子暨親王亦如之。中書省大都督府御史臺亦皆奉。上旨臨祭。成禮而去。先是。公病時。嘗屬諸子曰。我卽死。毋歸葬海濱。主上遇我過厚。可求皇城外地埋焉。且使後人習於禮義。及是。卜城東二十里玉山之原。惟右禮部爲奏請。上欣然可之。於是。以某年某月某日葬。禮也。公世爲善人。而其父尤柔良。人弱之。屢致侵蝕。父笑曰。吾諸子當有興者。毋久苦我。其後五子果貴顯。元季以公之貴。得屢贈三代。曾祖天成。榮祿大夫湖廣等處行中書省平章政事。祖宙。光祿大夫福建等處行中書省平章政事。勳皆柱國。爵皆封越國公。父伯奇。銀青榮祿大夫淮南等處行中書省左丞相。上柱國。仍追封越國公。曾祖妣陶氏。祖妣潘氏。妣周氏。妻兩董氏。皆封越國夫人。子男五人。其二卽禮與完。其三曰本。曰則。曰安。女五。二適士族。餘在室。孫男六。隋大業末。海內紛紜。汪華聚衆保民。據有歙宜杭睦婺饒六州之境。雖屢受隋爵。及唐高祖有天下。遂封府庫。籍民數。以歸

職方擢爲欽州刺史。歿於長安。其事與公似無大相遠者。蓋公以豪傑之姿。庇安三路六州十一縣之民。天兵壓境。避而去之。曾無一夫被乎血刃。其有功於生民甚大。然而天寵所被。賜官丞轄。享有祿食。而二子皆列崇階。赫奕光著。視唐則有加焉。於是歷序其故。著爲銘詩。以宣朗國家之鴻烈。而及公保民之偉績云爾。銘曰。

元季紛紜。羣雄相吞。公據海濱。志欲靖民。黃屋左纛。我非敢覲。綏定一隅。以候眞主。曦馭煌煌。出自東方。天威奮張。孰敢不來。王乃籍土地。乃封府庫。大開城門。委之而去。皇帝詔還。喜動龍顏。卿能庇民。朕數嘉嘆。卿居海邦。倚水爲強。旌旗揚揚。武夫泱泱。舳艫數千。橫行海中。諸蕃畏威。莫越其封。炳乎幾先。能順天命。卒全黎元。兵不血刃。何哉暴強。驅民鋒鏑。酣戰弗禁。身乃就殲。以此較彼。卿實爲能。爵之崇階。祿給子孫。天語褒嘉。金宣玉奏。公拜稽首。天子萬壽。惟公挺生。人中之豪。功在三府。其惠孔昭。華之保歛。事與公類。至今廟食。春秋不廢。公雖歿矣。德曷忘矣。太史銘矣。發幽光矣。

故資善大夫御史中丞兼太子贊善大夫章公神道碑銘

嗚呼。是爲吾友龍泉章公之墓。初予未識公時。輒稔聞其名。及公應聘而起。同赴於南京。同館於青溪。同出入禁署。以備顧問。如是者三四年。私竊以爲生我者父母。知我之志者。唯公而已。不知公何爲棄予而遽死矣乎。有善孰予相。孰知我瑕疵而攻之乎。神道之銘。公之子特以爲屬。肝腸百裂。其何能綴緝言辭乎。相知之深者不爲之。則鋪張君子之休美。不識當屬之誰乎。因拭淚而序之曰。公諱盜。字三益。姓章氏。

處之龍泉人。遠祖有曰巖者。仕宋。以兵部尙書守泉州。始家於南安。至唐康州刺史。及自南安遷建之浦城。及生福州軍事判官修。修生光祿大夫檢校太傅西北面行營招討制置等使持節高州諸軍事高州刺史仔鈞。娶練氏。生子十五人。其第三子獻誠。仕南唐爲銀青光祿大夫檢校司徒。獻誠生文錫。仕宋爲祕書省校書郎。文錫生都官郎中重。又自浦城遷於龍泉。子孫遂爲龍泉人。重生吉。吉生順。順生公琛。公琛生世安。世安生舉。舉生宗。宗生鄉貢進士輔。輔生聞義。聞義生用之。用之生強宗。強宗生煥文。則聞之高祖也。曾祖諱斯立。祖諱格。父諱遇孫。母某氏。公之始生。其音如鐘。父母疑爲不祥。幾棄不舉。及成童。巍然莊重。不習鄉井輕儇態。諸兄出應科繇。頗爲儕類所侵苦。公忿曰。彼徒謂我弱爾。吾不自厲。豈爲男子耶。乃往受事。縣官卽有曲者。舉正理直之。衆始愧服。比弱冠。從鄉先生王剛叔游。從事於正心修身之學。旣又聞金華爲文獻之邦。間出游以咨叩其統緒。浙東憲使禿堅不花請與語。悅之。已而改官陝西。要公與俱。至虎林。心忽驚悸。力辭而歸。抵家。父病已革。越八日而逝。人以爲純孝所感。至正壬辰。斬黃妖寇。自閩犯龍泉。公與從子存仁避亂山中。而存仁爲寇所執。公心計曰。吾兄止有一息。不可使無後。挺身出。謂賊曰。兒幼無所用。我願代之。賊聞公名。方出重購以求。及得公。大喜。賊帥欲問計。公正色拒之曰。若等皆有父母妻子。願爲此滅族事耶。賊怒。繫之柱。以刀磨其脅曰。不降者且死。公曰。貪生惡死。固人常情。然吾終不爲不義屈。賊愈益怒曰。汝誠不畏死耶。公曰。死卽死。何畏乎。賊壯之。不敢加害。公夜給守者。乘間脫身歸。乃集里民爲兵。不旬日擊卻之。處州府判官以兵來龍泉。欲盡誅平民。誑者石抹將軍宜孫實。

總兵政公走麾下。說曰：將軍知賊之由乎？曰：不知也。公曰：貧民迫於凍餒，故相挺而從盜，誠得一循吏，招輯之，民即平民耳。今不出此，而肆行剪屠，是殆揚湯以止沸也。不識可乎？石抹將軍曰：善。徵先生言，事幾敗，即檄判官毋擅殺。石抹將軍服公器識，留幕下，與議軍事。其平屬縣慶元及建寧之浦城、松溪、羣盜，公有力焉。上其功。江浙行省丞相康里公承制授公將仕郎。龍泉縣主簿辭不受。海寇起黃巖，掠沿海郡縣。行省命石抹將軍守台城。台之寧海，民亦爲變，攻圍台城急。石抹將軍飛檄召公爲援。公方退居田里，得將軍檄，即起曰：吾邦非石抹將軍，人且盡爲枯骨。今一旦有急，正我報德之秋也。集趨勇少年數百人，晝夜行至城下，約內外夾擊。賊遂潰。海寇亦遁去。寧海大飢，豪民吳甲、蔣乙積粟不糶。公言於石抹將軍，將軍因屬公行縣賑之。公至縣，即抵二豪罪，發其粟賑餓夫。其尤困者，俾僧作糜食之。公還龍泉，龍泉亦歲儉。大家有粟，高其直，且不發。公先以私田易粟貸里人，乃行勸分之政。民受其惠爲多。鄰邑青田潘惟賢爲盜，而龍泉監縣寶忽丁貪虐無狀。民因導潘攻縣治。寶忽丁棄印走。公同其師王剛叔召豪傑與賊戰，敗走之。縣治遂復。行省給銀幣爲賞。寶忽丁懼棄職，獲罪而愧。公有功，乃謀害公。公方贊元帥黑的兒開府處城，未敢發。會帥府問寶忽丁罪，遂結季溪惡少拒命，首害剛叔於家。帥府檄兵襲擊之。寶忽丁遁去。於是處之七縣盜皆蠶起。行省移石抹將軍以行樞密院判官分治處州。公謂石抹將軍曰：松陽小醜，不速平，將養成大患耶？將軍曰：唯君處之。公乃遣千戶曹勝安督兵，授以方略。一戰盡降之。分院上其功。行省陞承事郎松陽縣尹。又辭不受。元帥葉君琛攻鄭寇於麗水，屢爲所敗。分院調公及樞密院都事胡君

深合討之。公與胡君統軍至浮雲。賊衆來逆戰。並山爲長陣。兵旣接。我軍張左右翼夾攻之。賊大敗。直擣其巢穴。賊望見公來。拜乞曰。我非爲寇者。待我殲此海蠻。卽降矣。海蠻謂葉君所部海軍也。公曰。吾不知他特捕反者爾。賊爲內外二砦。公麾兵踰外砦立壁。或疑壁於兩砦間非利。公曰。非爾輩所知。我旣踰外砦。則內砦疑其已降。而外砦亦計其疑己。二砦相疑。破賊必矣。壁未完。賊突至。相持未有勝負。公麾奇兵橫擊。賊奔北。卽移兵圍內砦。數重。下令急攻。遂陷之。執鄭真諸法外砦亦降。行省復授福建行省檢校官。尋又改除奉訓大夫處州路總管府判官。皆不受。南行臺治書侍御史錢木烈思分臺於婺。長槍軍叛迫其城。治書遣從事楊迪徵師於公。公勒所部軍就道。長槍聞公至。輒引去。省憲交章薦於朝。除武德將軍。僉浙東都元帥府事。又辭不受。或疑爲要名。公曰。吾所將皆鄉里子弟。使其肝腦塗地。而吾獨取功名。弗忍爲也。青田賊吳英掠婺之金華。永康。東陽諸縣。聚衆猖獗。公議討之。分院乃調兵屬公。及胡君與賊屢戰。皆敗之。賊勢蹙。縛其黨張貴。李興甫等出降。遂昌凶右戶閉糶。土豪周天覺嘯聚殺之。元帥胡君往討。天覺負固不服。久之始請降。公曰。此賊不殄。必貽後患。胡君不聽。受其降。已而天覺果以復叛誅。始天覺之未降也。執其黨與三百人繫諸獄。至是。胡君欲盡坑之。公執不可。得生全者十六七。時天下日入於亂。公結廬匡山上。自號曰匡山居士。屬其子曰。兵將至矣。汝曹其保障州里乎。己亥冬。王師克處州。公又避地入閩中。今上皇帝遣使以束帛召公。公乃幡然而起。與青田劉君基。麗水葉君琛。金華宋濂同赴。召至建業。入見。上問勞曰。我爲天下屈四先生耳。然四海紛紛。何時定乎。對曰。天道無常。惟德是輔。惟不嗜殺。

人者能一之耳。上曰：卿等其留輔予矣。亡何擢僉營田司事。巡行江東兩淮之境。田荒蕪及耕墾者皆公籍之。差稅賴之。以便公以疾在告者久。上時遣使存問。及疾小愈。卽入謁。上見其來喜曰：疾其瘳乎？何遽出也？一日上忽念公。詢於中書左司都事張來碩曰：章溢日來康強否？來碩對曰：溢日夜念母不置。而以主上遇之厚。不敢以言鬱鬱成疾耳。上卽命公歸省。賜以白金文綺。而留其季子存厚於京師。浙東始設提刑按察司。卽擢公僉其司事。尋命還處州代總制。胡君入朝。而爲存厚娶胡君女。賜賚優渥。且俾存厚入侍皇太子。以示親信。胡君出師溫州。復詔公還守處州。饋餉供億。規措無缺。而民不知勞。及師旋。卽日以總制事付胡君。而還其部。王師平荆楚。設湖廣提刑按察司。遷公僉司事。公入見。上慰勞之曰：紀綱之事。今屬卿矣。公旣至。覩荆襄多廢地。遂建議分兵屯田。且以控制北方計爲便。上曰：所言甚善。第未暇耳。湖廣行省鎮撫。回回怙勢作威。輕重人罪。以爲常。公廉得狀。坐以法。會未幾。河內道按察司宋思顏以浙東憲史事不白。下獄。而浙東按察使孔克仁僉事王璘亦以事被逮。辭或連公。公憂懼不知所爲。上遣太史令劉君基喻公曰：予素知章溢守法令。毋疑也。旣而胡君以兵入閩。陷沒處州之境。皆動搖。上命陞公浙東按察副使。往鎮之。平陽瑞安浦城福寧軍民等事皆隸焉。公辭曰：臣前任浙東無狀。同列皆獲罪。而臣獨蒙寬宥。今若加陞擢。則益重臣過。疆場之事。臣身任之。萬死且弗避。副使之命。臣不敢拜。上重違其志。命仍僉浙東按察司事。比至。山寨或已叛。公宣布詔旨。軍民皆感動。乃誅其首叛者。餘皆帖帖。青田夏清聞胡君敗。與福建參政范昌大合寇慶元龍泉。時官兵盡戍浦城。城中僅足自守。公召舊部義兵。使據

要害。列木柵爲屯。勢相聯絡。別命元帥祁興季。汝卽龍泉縣治。亦環植木城。賊聞不敢犯。公長子存道。初以元帥戍浦城。及是有旨。命存道提兵爲遊擊。而公卽處城坐鎮之。公謂父子相統。於律不宜。乃上奏請罷存道官。不允。兵戍浦城者。以食不繼爲病。上以屬公。泊浙東行省右丞李文忠。李公欲運處州糧餉之。公以爲舟車不通。而軍中所掠糧甚殷。請拘入官。而均給之。兵食乃足。青田稅官金甲發其同僚白乙。匿官課。乙旣誅死。而甲恣爲姦利。公訊之。甲善口給辨。數不置。公曰。汝罪狀已明。奈何欲以口舌撓法乎。其辭遂屈。上知爲公所鞠。當不寃。命斬之。建寧守將阮德柔遣使來納款。人咸以爲詐。公曰。陳友定據全閩。勢必不能容。故德柔爲圖自全計。非詐也。以其事聞。詔許德柔以元官守本郡。命比下。德柔果爲友定所并。公因留其使。厚存卹之。温州茗洋周遂卿恃山險常爲寇。鄰邑皆患之。而郵傳之通。平陽瑞安者。亦爲所要遮。公命存道合平瑞總督孫安之兵擒斬遂卿。中書命處州造海舟若干艘。并僉溪船戶爲水軍。其戶凡一千。旣有領之者。而又隸於軍府。役繁而事擾。公上奏設水軍千戶所專統之。處多山而少田。軍需恆不足。胡君爲奏免。唯輸硫黃白藤於朝。而行省復有所科。公屢以爲言。罷之。水軍千戶任惟淵。朱仲欽共戍青田。會寇至。仲欽逆戰。而惟淵走還。仲欽以無援故敗。公斬惟淵以徇。遣指揮何世明擊寇走之。惟淵乃胡君所任信者。旣伏誅。部曲莫不股栗。浙江行省參政朱亮祖總兵取温州。公調何世明以軍從。温州平。公聞其掠人子女。命鎮撫林理徵之各部。送還其家。海隅旣寧。公請朝京師。上報曰。吾知卿在邊良苦。俟平吳。當卽召卿爾。及浙西諸郡皆平。上遣使召公。且命分兵征八閩。而存道守處州。公旣入見。上


嘉獎甚至。且諭羣臣曰：章盜雖儒臣，父子宜力一方。寇盜盡平，其功誠不在諸將後。公再拜謝，不敢當。明日上召問征閩諸將何如。公對曰：御史大夫湯和由海道進，平章政事胡廷瑞自江西入，此固必勝。然閩中尤服浙江平章李文忠之威信。若令文忠帥師從浦城取建寧，此萬全計也。即日詔文忠出師。如公策處州之糧，其舊額一萬三千石有奇。後以軍興，加徵至十倍。民不堪命，公言之丞相。丞相入奏，上曰：吾勞處民久矣，詔從其舊。温州黃宗雲朱君達來附，各授以元帥之職，還守其土。及我師征溫失利，輒叛去。溫既平，君達又請降。公曰：何物小醜，叛而復降，納之，是無法矣。奏戮之。浙江行省承詔作大舟入海，徵輸巨材。檄處州與諸府同。公曰：處婺之交，限以峻險，縱有水道，何從出。且凋蔽之民，曷以勝此。公力言於省臣，止之。洪武元年正月上，卽皇帝位。有事於太廟，公與執事畢，越翌日，召公及劉君基入見。上御奉天殿，羣臣咸在上。歷陳其功，並拜御史中丞。公辭不允。尋兼太子贊善大夫。公務存大體，不屑屑於細故。或以爲言，公曰：憲臺百司之儀表，居其職者，當先養人以廉恥，使人避而不犯，豈直恃搏擊爲能哉。上親祀社稷，會大風雨，還坐外朝，怒儀曹議禮不合，以致天變，將殺之。公奏曰：風雨已連朝，無足恠者。縱禮官議有未盡，陛下精誠自足，以格神明，願寬雷霆之怒。上爲之霽威。上愛公甚，嘗語公及劉君曰：二先生年向耄，恐感霜露致疾，善自衛攝，不宜早趨朝也。存道部鄉兵萬五千，從李公入閩。閩平，詔存道以兵從海道北征。公持不可，曰：鄉兵農人耳，始令征閩，許以事平歸農。今復調之，是爽信也。上不懌而罷。公繼論奏曰：兵已入閩者，俾還州里，昔嘗叛逆之民，宜籍爲軍使北征。一舉而恩威著矣。上喜曰：孰謂儒者果迂闊哉。非先

生爲朕一行無能成茲事者公受詔遂行比至處州母夫人已歿公馳還舍援例乞丁憂詔不允丞相李韓公復貽書道上眷倚之意而遣存厚還家公灑泣而出日治戎事惟謹鄉兵旣集命存道部領由永嘉浮海北行上章乞如律守制詔仍不允已而章再上上覽之爲惻然曰吾固知其情不可奪矣但朕憲臺缺人耳遂可其奏存道至崑山走京師聽進止上諭之曰汝父事朕宣勞爲多今汝又帥師北上尙勉立事功以無忝爾父則予汝嘉因授以處州衛指揮副使戍於上黨尋移平陽公自喪母夫人悲感過度居常忽忽若無以自存者及營宅兆親負土石而感疾益深子女見之皆相顧悽愴公曰勿憂也吾父母幸以安厝祖宗丘墓幸粗整飭歲時薦饗幸有條序吾庶幾無憾第荷國厚恩未能報效此爲歉耳臨終親友何濱來候曰當收斂此心毋有所執滯公曰吾久已知之遂薨於龍淵之私第實洪武二年夏某月某日也享年五十有六訃聞上甚憫悼乃親撰文遣官卽其家祭之以其年某月某日葬於某山之原公娶陳氏勤儉恭淑克盡內助子男三人長卽存道明威將軍處州衛指揮副使次存誠次存厚女二人長適陳某次在室孫男四人集慶集恭集善集正女二人公性篤於孝友父喪未葬而盜發里閭室廬被焚公稽顙籲天火至柩所而滅事母夫人備極孝養每事必得其懽心與二兄別居已久旣創第龍淵請二兄同居以奉母怡怡之情藹如也先世有墓祠曰標慶庵公起其廢一新之且益田以供祀事而定祭享之禮命子孫世守之其於宗族里黨患其子弟無所於學則創龍淵義塾延碩師以教之患其死者無所於葬則以玉峯西崗爲義阡聽其藴瘞焉又以王剛叔實鄉郡之賢者而石抹將軍能忠於所事卽龍泉劍

水之陽。作祠宇祀之。曰忠賢祠。蓋凡可以聳善扶義者。無不爲也。公狀貌宏偉。器局曠曠。而撫世酬物。一本於誠。一循乎禮義。外若和緩。而其臨大事。則議論爭辨。不避權勢。必折衷於理而後已。其與學士大夫談聖賢之道。如味飴密。尤篤尙伊洛之學。嘗曰。古人爲學。皆躬行實踐。人倫日用之間。無非學也。今人以記誦詞章爲務。特學之末事耳。故公於章句之習。皆不以屑意。而於綱常之大端。有關於世教者。恆切切爲人言之。生平務在濟人利物。嘉言善行人。皆能道之。不可勝紀也。余竊聞之。章爲東南著姓。自五季以迄於宋。代多顯者。內則兩制八座。外則州牧邑宰。皆未嘗無其人。親提師旅。捍衛鄉州。能成其勳名。唯太傅公爲尤盛。閩人至今道之。公當元季紛擾。羣盜四起。磨牙吮血。而桑梓爲墟。公談笑而起。皆劓殄之無遺育。處之民至今思之。於是聲光流顯。上致萬乘之知。持節諸部。執法中臺。其功業視太傅公疑若過之。此無他。太傅公之所遭者衰世。公之所際遇者有道維新之朝也。古人所謂能光前人者。公其有焉。予敢評騭公行。勒諸堅珉。以垂示永久。於戲。金或可銷也。石或可泐也。公之功不可忘也。銘曰。

五季之亂。殺氣昏。太傅隻手障南閩。西巖結壘。兵雲屯。狗鼠偷竊。方繽紛。怒來欲以一氣吞。陰功上聞。帝爲欣。敕生蟄蟄千子孫。白笏堆床如爛銀。匡山繼之譽益振。方頤疎髯目電焯。音吐鴻鸞。鍾在軒。蚩蚩赤子。扇妖氛。額抹絳帕。手握種。嘯呼不異鬼彪羣。公起長驅。汗且奔。一障佇立無邊塵。較之太傅功。或殷重。微疊照絕等倫。聖明天子御紫宸。濟濟萬國咸來賓。束帛往聘東海濱。加以祿爵恩寵新。庸田使者勞徠勤。繡衣行部照青春。貪夫宵遁不待晨。一朝南徼將星湮。枯山恍惚失嶙峋。狐狸跳舞。騁妖神。帝曰章溢。

汝老臣。整汝戎旆。旋汝轅。公車戾止。集吏民。導宣威德。語復諄。有叛命者。誠以徇。叶坐鎮鄉城。如虎蹲。大兒游擊。左右巡。四郊帖帖。多柔馴。召還執法。居諫垣。長跪敷奏。懼逆鱗。萱堂風慘。逝驚魂。上表陳情。達帝關。哀號負土。自築墳。因劬致疾。亟返真。聞之孰不淚霑巾。公知學術歸一原。時勢濂洛。概本根。所以不坐枝葉繁。文事武備。道乃存。黃腸題湊。藏山樊。大書遣行。勒堅珉。傳千百載。期無諉。



宋學士全集卷之十八

神道碑

大明追崇楊王神道碑銘

皇帝躬膺大寶。式展孝思。既追崇祖宗四代帝號。建立太廟。復念皇太后之所自出。追封外王父爲楊王。外王母爲楊王夫人。建祠于太廟之東。歲時遣重臣致祭。近有來自淮陰者。言王墓在盱眙如故。上聞之。悲喜交集。卽詔內臣及園丘署令往祭。而脩治之。置灑掃之戶。凡三護視塋域。且命詞臣撰文。以樹諸神道。臣濂伏讀御製王之行。若曰。王姓陳氏。世爲維揚人。不知其諱。當宋之季。名隸尺籍伍符中。從大將張世傑。扈從祥興。帝駐南海。至元己卯春。世傑與元兵戰。師大潰。士卒多溺死。王舟亦爲風所破。幸脫死達岸。與一二同行者。累石支破釜。煮遺糧以療饑。已而糧絕。計無所出。同行者曰。我等自分必死。聞鬻骸山有死馬。共烹食之。縱死亦得爲飽鬼。不識可乎。王未及行。疲極輒晝睡。夢一白衣人來。謂王曰。汝慎勿食馬肉。今夜有舟來共載也。王以爲偶然。未之深信。俄又夢如初。至夜將半。夢中髣髴聞櫓聲。有衣紫衣者。以杖觸王之膊曰。舟至矣。奈何不起乎。王驚寤。忽身在舟中。見舊所事統領官。時統領已降于元將。元將畏舟壓。凡有來附者。擲棄水中。統領憐王。亟藏之。皇板下。自取乾餼從板隙投之。王掬以食。度王之渴。乃與王約。以足撼板。王卽開口向隙受漿。居數日。事將洩。皆彷徨不自安。忽颶風吹舟。盤旋如轉輪。久不能

進元將大恐。徧求於禁祈者不可得。統領知王能巫術。遂白而出之。王仰天叩齒。若指麾鬼神狀。風濤頓息。元將喜。因飲食之。至通州。賈王數鉅魚。送之登岸。王歸維揚。不樂爲軍伍。避去盱眙津里鎮。擇地而居。以巫術行。王無子。生二女。長適季氏。次卽皇太后。晚以季氏長子爲後。年九十九歲而薨。遂葬焉。今墓是已。臣濂聞之。君子之制行。能感於人固難。而能通於神明爲尤難。今王當患難危急之時。神假夢寐。挾之以升舟。非其精誠上通於天。何以致神人之祐。而至於斯也。王之羣行。其詳雖若不可知。舉此而推之。則其積德之深厚。斷可信矣。是宜慶鍾聖女。誕育皇上。以啓大明億萬年無疆之基。於戲。盛哉。昔日史臣贊堯之德。首以親九族爲言。其效至於黎民於變時雍之盛。然九族之中。母族居其三。皇上以念母之故。思王不能忘。封以王爵。享以祠廟。今又樹碑墓道。以紀其異行。是皆以孝治天下也。將見四方嚮風。或知以孝自勉。皞皞熙熙。臻夫隆平之治。不難矣。臣濂旣序其事。復再拜稽首而獻銘曰。

皇帝建極。先展孝思。疏封母族。自親而推。錫爵維揚。地邇帝畿。立廟崇祀。玄冕袞衣。痛念宅兆。卜之何墟。閭師來告。今在盱眙。皇情悅豫。繼以涕洟。卽詔禮官。汝往蒼治。毋俾羹豎。跳踉以嬉。惟我揚王。昔隸戎麾。瘳風蕩海。糧絕阻饑。天有顯相。夢來紫衣。挾以登舟。神力所持。易死爲生。壽躋期頤。積累深長。未究厥施。乃毓聖女。茂衍皇支。蘿圖肇開。鴻祚峩巍。日照月臨。風行電馳。自流徂源。功亦有歸。無德弗酬。典禮可稽。聿昭化原。扶植政基。以廣孝治。以惇民彝。津里之鎮。王靈所依。於昭萬年。視此銘詩。

大明故王府參軍追封縉雲郡伯胡公神道碑銘

上天既革元命。皇帝定鼎金陵。遣大將下浙河東諸郡。而婺衢處三州相繼平。時當草昧之初。上思得智勇之才用之。於是處之胡公仲淵躍然而起。以自赴功名之會。入陪廟算。出鎮鄉邦。言聽計從。寵遇無比。浙東之俊彥。攀龍鱗而附鳳翼者。皆自公始。若公者。可謂卓犖不羣之士矣。公諱深。仲淵其字也。系出漢安定。宋初有諱棟者。自潤之丹陽遷處之龍泉。因家焉。棟生璠。璠生文虎。文虎生竦。竦生晟。晟生滂。滂生衢。州錄事參軍松年。松年生鄉貢進士應辰。應辰生温州樂清令琇。琇生江南西路兵馬都監見大。則公之曾大父也。大父諱堂。父諱鈺。仕元爲征東行中書省左右司員外郎。母趙氏。生三子。公其長也。次曰潭。曰海。繼母季氏。生一子。曰溥。員外府君早歲宦遊京師。公始十齡。而大母季夫人與母夫人相繼亡。公侍大父。奉繼母。撫幼弟。艱難刻厲。以自植立。未弱冠。走京師。侍府君。適府君使高麗。復往候焉。居久之。府君棄捐館舍。公崎嶇萬里。奉柩南還。舟行一日。泊大崖下。夜夢神語之曰。此崖且崩。宜急避。驚覺。趣移舟。俄頃大風雨至。崖果崩。聲如萬雷。旣歸葬於縣北之團源。遂廬於墓左。悉取諸子百氏天官地志兵謀術數醫藥卜筮老釋之書而研究之。發爲文辭。操筆可立就。當元之季。江淮倣擾。蔓延閩浙間。盜由建之浦城松溪入龍泉。公嘆曰。浙水東地氣白矣。禍將及。乃集鄉兵。結寨於湖山。已而處州之民相聚爲盜。江浙行中書省調萬戶石抹公宜孫戍處州。辟公參謀軍事。檄所隸諸縣募壯士爲軍。浹日間得數千。公引之屯竹口。下令賊中曰。爾皆良民也。因驅迫故爲亂。棄仗卽仍良民矣。賊以公長者。其言不欺。盡毀旗械。肉袒請降。温州戍卒韓虎陳安國殺主帥據城叛。行省命宣慰使恩寧普公討之。道由處州。與公語意合。帥府

軍事復辟公參謀之。公曰：溫州叛者，唯一二人耳。若破其城，玉石必俱焚。如平民何？遣辯士入城，說其黨曰：韓虎悖逆亂常，今王師四集，旦夕且攻城。雖金湯無不破者。若輩胡爲與賊守？自取作蠶粉耶？將軍未忍，卽加兵，苟能去逆效順，悉從原宥，或稔惡不悛，城一破，悔無及矣。其黨相向泣曰：吾屬自度旦暮鬼耳，儻獲復生，敢不唯命。乃殺韓虎等，以城降。溫城瀕海，民以漁爲業。時城閉者三月，民病甚。公請發粟賑之，驢呼之聲，載于道路。宣慰欲列公功聞于朝，公辭。旣而宣慰以行省參政總兵征鄱陽，復邀公俱行。戎務無鉅細，悉屬之。青田潘惟賢聚衆爲叛，龍泉長吏聞風遁去。賊遂焚縣治。公之師曰王毅先生，與門子弟集義兵，搗退之。里中惡少年疾其功，因害先生。公在鄱陽馳而歸，執害先生者盡殲之。縉雲之黃邨、松陽之白巖、遂昌之大社、麗水之浮雲、泉溪，無賴之氓，咸爲盜根，勢蟠結不可禦。行省丞相康里公承制以石抹公爲行樞密院判官，分院鎮處州。旣至，假公分院行軍都事，統兵討麗水。攻泉溪賊寨，拔之。未幾，又平浮雲、白巖。賊懼，遂來降。縉雲盜亦就平。乃移師攻遂昌。賊會周天覺、方友元領其精銳出迎敵。公望見笑曰：賊若堅守不出，未易卽殄滅。今茲之來，豈非天授我乎？分部諸校，以正陣接戰，以奇兵夾擊之。別遣遊軍入山，搜其伏匿。比戰，賊三面受擊，輒大敗，斬首數千級，生擒八百人，獲方友元、梟之。乘勝直攻大社。周天覺降。復移兵討青田。賊黨金德安殺潘惟賢兄弟以降。先是，國兵取浙東，婺衢旣下，獨處州爲石抹公所守，不降。歲己亥，今上皇帝遣僉樞密院事胡公大海由間道取處州。石抹公出戰，敗北。大軍入城，而分兵取屬邑未附者。公時以假元帥統龍泉、慶元、松陽、遂昌四縣兵，欲閉關爲拒守計。四縣士民咸請於公。

願內附以全民命。且曰：君治兵殆十年，勤勞亦至矣。而朝廷無一命之錫，國家負君，君何負於國哉？公知時事已去，乃解甲出見胡公。四縣因不受兵，上素聞公名，召至南京，待以殊禮，居亡何，擢中書左司員外郎。上日與公論天下事，公有言未嘗不稱善也。遂詔公還處州，招集舊所部將校兵卒以從，征西上既平，江西命公以親軍指揮守吉安。會浙東苗軍爲變，婺守將旣被害，而處城亦爲所據。上遣公復處州，比至城，已復除。公浙東行省左右司郎中，總制處州軍民事。郭郭甫被兵，民物凋瘵，而山寇乘間竊發，人情未固。公隨方招捕，凡首惡卽誅之，然猶慮戍兵之寡，日募之，獲勝卒萬餘人。諗於衆曰：兵少不足禦敵，師衆又無以食之，奈何？衆皆曰：養兵所以衛民，苟不爲禦備計，子女玉帛且不保，況於食乎？公乃因民之產，以權宜增賦之，浚海軍素驍橫，及是以復城有功，橫益甚。公擇其尤無良者斬之，衆乃讐服。江西食東浙鹽，而有司十分稅一，販者鮮至。公請以二十分收一，商賈遂通。城南枕大溪，浮橋之廢已久，橋隄當水之衝，亦爲所齧蝕幾盡。公卽上流比舟爲梁，以濟行者。州學敝壞，講舍僅存，用以貯官粟。公撤而新之，薦新進士吳世昌爲郡文學，以司教事。城中民廬多爲戎士所據，混淆而處。公度閒曠之地，建營屋數十區，使別居之。縉雲官田其稅額甚重，執里役者恆以私粟代償，公以新沒入之田實其數，其害乃除。諸暨守將謝再興叛，兵犯東陽，平章李公文忠擊走之。公引兵爲援，建議以爲諸暨浙東藩障，若諸暨不守，則衢處不支矣。乃度地去諸暨六十里，並五指岩新築一城，不旬日而成。樓櫓濠柵靡不畢備。上聞諸暨叛，遣使來議，別爲城守計。暨至，城已完，上嘆賞不已。其後浙西將李伯貞大舉入寇，兵號二十萬，頓城下，城堅不可

攻敗績而去。上念公立城功，以名馬賜之。青田之蘆茨地，接閩徼，人素獷悍，葉仲賢恃其險，屢服屢叛。乘我師在外，復來寇。公怒，還軍深入，禽其渠魁，少壯者皆籍爲兵。二十年，逋誅之盜，一旦就平。温州方明善攻我平陽，公出偏師復之，并復瑞安所侵地，而親統正軍攻温州。明善勢蹙，與其父國珍議納歲幣，詔公還師。明善繼以鹽若干來進貢，上命處州易銀以入內藏。上怒銀色惡，責守令使償。公曰：「此吾過也，守令祿薄，何能償？」乃售龍泉田以銀九百兩代輸。公尋入覲，上欲留公，且柄用之，以邊事未輯，願還守外。上時已卽王位，乃擢王府參軍，仍總制處州等翼。陛辭，上諭之曰：「俟閩浙盡平，當擢汝中書矣。」福建陳有定擾邊，公奉命征之，遂取建之浦城，而崇安、建陽二縣亦下。上賜以所乘駿馬，建之守將阮德柔兵四萬屯錦江，實出我師後，公還兵擊之，破其寨柵，有定大慙。帥銳卒亟圍我營，公突陣與決戰，馬蹶，因被毆。有定旣得公，頗禮遇之。公具道天子仁聖，四海歸心，羣雄樂爲之用，且援竇融歸漢故事，撼之。有定初無殺公意，會元使至，督迫之，遂遇害於福州。實歲乙巳之春也。享年五十有二。上痛悼不已，命使者卽其家祭之。復詔中書議加卹典，追封縉雲郡伯，有爵而無階，官職勳者，有司之制未備也。公天資穎拔，智識絕倫，藝術弗學，則已。學之則無不精，性倜儻，好施予，賢士有貧乏，傾橐以周之，弗吝也。其守鄉郡，凡五載，馭衆一以寬厚，用兵十餘年，未嘗妄戮一人，恩惠在人甚多，故其歿也，聞者莫不流涕。鄉人爲立祠，宇祀之。公元配同里項氏，先五年卒，生二子，長曰楨，宣武將軍，僉處州衛指揮使司事。次曰樞，女一人，適章存厚。繼室潞陽楊氏，前中書左司郎中元杲女弟也。公旣沒之二年，楨等乃刻木爲象，具衣冠以葬，實祔於源之。

左葬已來徵濂爲之文。昔濂侍上於白虎殿。忽顧問曰。胡深何如人。濂對曰。文武才也。上曰。誠如卿言。浙東一障。朕方賴之。則上所以倚公者至矣。然公亦知上委任之深。而無以圖報。嘗謂人曰。區區承詔鎮處城。皇靈覆育。幸已寧謐。誓將挈全閩之地。以入版圖。庶展犬馬之微衷也。奈何功業未就。而死及之。其非命也夫。濂辱交友者五六春秋。見公酒酣耳熱。指揮三軍。而雄姿奮揚不可遏。及與縉紳之流。論文評詩。則欲然布衣書生也。濂未嘗不服其勇而愛其謙。今公不可作矣。敢用備著公之事。揭諸墓門。以告世之知公者。銘曰。

沈沈胡公。萬人之英。一劍橫空。莫之敢撓。浙河之東。地氣盡白。此爲兵徵。見於龜莢。爾衆荷戈。來入我堡。寘爾枕席。披爾水火。公師如風。鼠寇如雲。一鼓之餘。散爲埃塵。節鉞出鎮。涉歷五年。桴鼓不驚。雞犬晏然。誰登叛人。陷我諸暨。公遷其城。寇至輒敗。皇用嘉錫。使車絡繹。天閑龍馬。賜公弗惜。公感主知。酣歌慨慷。誓提八閩。以歸職方。王師所屆。勢如破竹。天未厭亂。三軍夜哭。公材孔多。公志弗阿。月出如赭。公命奈何。丈夫之澤。流於異方。孰能行之。父母之邦。匪公之臨。千里枯骸。公雖止斯。庶亦無愧。廟堂有嚴。肖像其中。精靈翕然。上與天通。括蒼之山。其翠欲滴。公名配之。有永無斁。

中順大夫禮部侍郎曾公神道碑銘有序

治古之時。非惟道德純一。而政教脩明。至於文學之彥。亦精膽宏博。足以爲經濟之用。蓋自童卯之始。十四經之文。晝以歲月。期於默記。又推之於遷固。范曄諸書。豈直覽之。其默記亦如經。基本既正。而後徧觀。

歷代之史。察其得失。稽其異同。會其綱紀。知識益且至矣。而又參於秦漢以來之子書。古今譔定之集錄。探幽索微。使無遁情。於是道德性命之奧。以至天文地理禮樂兵刑封建郊祀職官選舉學校財用貢賦戶口征役之屬。無所不詣其極。或廟堂之上。有所建議。必旁引曲證。以白其疑。不翅指諸掌之易也。自貢舉法行。學者知以摘經擬題爲志。其所最切者。唯四子一經之箋。是鑽是窺。餘則漫不加省。與之交談。兩目瞪然視。舌本強不能對。嗚呼。一物不知。儒者所恥。孰謂如是之學。其能有以濟世哉。此濂銘亡友曾公之墓。憤激於中。而復繼之永慨也。公諱魯。字得之。曾其氏也。孔門弟子。邨公五十七代孫。其居新塗吉陽里者已久。世裔之傳。與夫轉徙之詳。昔以著於公之先墓。茲不重載。曾大父兼善。宋贈大理評事。祖天麒。宋宣教郎軍器監主簿。父順元。韶州路儒學教授。妣劉氏。公年七歲。能暗誦九經。一字弗遺。奉禮郎簡君正理欲以神童舉於朝。其父力止之。及齒稍長。取三史日記之。尋及其餘。數千年間國體治亂。人材忠佞。制度沿革。咸能言之。有叩之者。如山川出雲。層見疊敷。杳莫察其端倪。公殊不以爲足。所藏子集。動至數百家。各攬其精。而掇其華。聞有僻書隱牒。不憚道路之遠。必購得之。旣得。必鑄燈讀之。達旦不寐。發爲辭章。龐蔚炳朗。毅然有不可奪之氣。廬陵劉提舉岳申與之語。連日夜弗休。嘆曰。不意後生中能至於斯也。其將以文鳴乎。杜內翰鄉之丈人行也。公負笈從之游。益充拓其所未至。寤疑辨惑。惟日不足。遂以博極羣書稱於時。公猶謂未要於至道。述長書一通。謁虞文靖公。集於臨川。虞公大悅。曰。昔程子與張敬夫。年十六七。脫然有志聖賢之道。子能如是。復何讓古人。公年蓋十九矣。由是益潛心濂洛關閩之學。分別義

理密如蠶絲牛毛。而尤愛吳文正公激之書。吳公亦居臨川。其著書滿家。無大無小。公一一訪獲之。玩釋未嘗釋手。久之充然有得。盤桓林泉。以道自娛。若將終身焉。至正壬辰。天下大亂。州縣所在釋騷。公召里諸豪集健兒持兵以保障乎一方。仍椎牛醞酒。開陳逆順禍福。言甚剴切。衆皆聳耳而聽。卒無敢犯非義者。人號曰君子鄉。及入國朝。有詔纂脩元史。勒成一代之典。遣使者起公于家。公贊決部居。補苴罅漏者不一而足。其功爲最多。史成。上坐端門召諸史臣。有白金束帛之賜。公居其首焉。公將乞身還山。會朝廷開局編類禮書。輿論以老成之士無踰於公者。共堅留之。議禮之家有如聚訟。自古難定於一。公當羣言沸騰之中。揚言曰。某禮宜據某書。則是從某說。則非。有不服者。爭相辨詰。公歷舉傳記答之。各心醉而去。俄選入儀曹爲祠部主事。階承事郎。時洪武二年十二月也。常忠武王薨。高麗王遣使來祭。公索其文觀之。使者靳不與。公不可。使者不得已出之。外則襲以金龍黃帕。內則不書洪武之號。公責之曰。龍帕固疑誤用。若納貢稱藩而不奉正朔。君臣之義果安在耶。使者頓首謝過。皆命易去之。乃已。安南來貢。主客曹已受其表。將入見。公取其副覽之。其王乃陳叔明。公曰。前王陳日燧爾。今驟更名。必有以也。亟白尙書詰之。使者不敢諱。蓋日燧爲叔明所逼而死。遂篡其位。中心懷愆。故託脩貢以覘朝廷之意。上聞之曰。烏虜何狡獪如此。卻其貢不受。五年二月。上問丞相曰。曾魯在禮部。今何職耶。對曰。不過主事爾。卽日超六階。拜中順大夫禮部侍郎。公以順字犯父諱。辭。就朝請下階。吏部以國法有定。不之許。倭巨入寇。戍將每捕獲之。上憫其無知。命儒臣草詔歸其俘。公之所譏。有中國一視同仁之語。上悅曰。頃觀陶凱文。已起人意。

今魯復如此。文運庶其昌乎。凱禮部尙書也。八月奉旨考京畿鄉試。入院之後。忽吐血一升。公猶力疾閱卷不息。自是遂奄奄不振。九月膏露降鍾山。羣臣咸見諸詠歌。獨公譏賦以進。十月上將郊祀。出宿齋宮。命取諸作。使侍臣更番誦之。至公。獨曰。此曾魯作耶。援據既精。鋪敘有法。豈新進之可驟至哉。十有一月。疾逾篤。上章乞骸骨。甚至中書以聞。上惻然許之。十有二月辛卯。歸舟至南昌。公謂次子圭曰。吾命止。明日不能至家矣。然吾以一介韋布之士。受國寵恩。位躋法從。又得守正而斃。死復何憾。所憾者。不見二孫之成立也。卽趣具舳舻爲書戒之。壬辰。次石岐潭。果斂衽而逝。距家纔兩驛爾。丙申。至故居。丁酉。始具棺殮。擇地於縣南屏山之陽。以六年某月某甲子。祔葬九世祖高安府君之塋。從治命也。公蓄德熙和人。近之者。溫如春風。不見忿戾之色。然其人則山澤之癯身。退然若不勝衣。未嘗有所矯飾。其處家也。事親克孝。父喪。哀毀致疾。踰年而後能起。已而二兄諸姪相繼捐館。公披淚經紀凶事。三年間。葬十餘喪。且撫存其孤。憊。惟恐或失其所。平生輕財仗義。喜周人之急。四方賓客。日登其門。公倒屣迎之。了無倦容。嘗一試江西鄉闈。有司真諸乙榜。人爲不平。而公亦澹如也。其出仕也。精白一心。有知無不爲。凡典禮涉於制度者。必經公損益。而後定。雖古者吏牘之繁簡。署宇之上下。人所不能知。公獨稽諸書以爲決。公誠所謂濟世之學者。非邪。公屬文不喜留稿。其徒雖有所輯錄。猶未成書。其自著書。有六一居士集正訛。南豐類稿辨誤。藏於家。他咸未脫稿。當公修元史時。濂實爲總裁。及入南宮。又有僚友之好。故相知號爲最深。共坐官齋。更析互辨。每至夜分。嘆末學之空虛。傷古道之寥落。又復相視。靦然一笑。嚴陵徐尊生嘗有言曰。南

京有博學之士二人。一以舌爲筆。一以筆爲舌。其意蓋指公與濂。嗚呼。尊生過矣。濂也何人。而敢上僂於公哉。雖然。公未嘗欲棄濂也。相期他日幸歸休。必胥會焉。共成一書。庶可藉手以見前賢。公今不可作矣。故因銘墓之文。而屢興懷於治古之時也。世之讀者。必將深感焉。公讀書之室。曰守約齋。學者遂稱爲守約先生。享年五十四歲。娶聶氏。先二十年卒。公再不納配。一榻蕭然。如山林枯槁之士。人難之。子男二人。長塾。今來請銘者。次卽圭。出爲仲兄後。女一人。應真。適劉奉孫二人。正龍。夢龍。銘曰。

氣化糾纏。人文昭宣。萬類斯甄兮。天設地施。一偶一奇。形聲相資兮。載藉繽紛。六藝攸尊。各闢其門兮。枝分葉敷。散爲千塗。混其精魄兮。彌綸大邦。物采文章。有變有常兮。不生碩儒。孰軋其樞。孰苞其腴兮。玉筍之陽。神珠吐芒。莫自翳藏兮。大明麗天。束帛箋箋。蒐羅俊賢兮。衰褒鉞誅。寓於策書。輿論所孚兮。儀曹之升。議禮稽經。日維烝烝兮。黼黻帝猷。上窺殷周。功在刪修兮。所積之訖。所發之深。開陽闔陰兮。正笏垂紳。其色闇闇。邦之老臣兮。媚學躑躑。其中枵然。何翅霄淵兮。天胡降喪。一鑑之亡。四國之傷兮。其神上征。化爲列星。寒光晶瑩兮。下射屏山。馬鬣桓桓。名在不刊兮。

四十二代天師正一嗣教護國闡祖通誠崇道弘德太真人張公神道碑銘有序

洪武丁巳冬十有二月五日。四十二代天師張公。薨於龍虎山之私第。年甫四十有三。禮部尙書張籌。卽爲奏聞。皇上嗟悼者良久。且曰。朕欲命其徧祠五嶽。今方一至嵩山。何期大數止於斯耶。遂親製文一通。遣前浙江行省參知政事安慶爲弔祭使。仍令其冢子宇初襲掌教事。戊午春二月十六日。宇初奉公冠

劍權厝南山先墓之次。至十有二月某日。卜宅兆於某而瘞之。宇初恐遺德未能大白於世。與羣弟子輯爲成書。使張致和卽金華山中。請銘神道之碑。濂幸辱與公游。義不可辭。公諱正一。字仲紀。姓張氏。信之貴溪人。漢留文成侯四十六代孫也。重紀至元乙亥夏六月十三日。其父太玄真人坐而假寐。忽見神人飛空而至。曰。余自華蓋山來。至君家。願見真人。及覺而公生紫雲覆庭。紅光滿室。人以爲祥。公年七歲。雙目爛爛如巖下電。容止異羣童。後三歲。太玄出游五岳名山。指相傳雌雄劍及玉刻陽平治都功印。曰。龍星再集於亥。吾兒當持此。大振玄風。太玄渡淮化去。而公之仲父嗣德繼主其教。仲父薨。衆論咸屬於公。公力讓仲父之子正言。正言薨。公始嗣其職。實至正己亥之歲。太玄之懸記。至是始驗。公陞廣筵。開演道家玄旨。四海學徒聞者。聳然領解。時天下大亂。經籙祕而不傳者十年。公乃啓黃書赤界紫素丹刻之文。授其徒胡合真。整比以行。奉贄來受者。川赴雲蒸。劍失其一。流落鄱陽李氏家。夜生光怪。公訪而合之。辛丑。上統大將親取江西。公知天運有歸。遂遣使者上牋述臣順之意。乙巳。公朝京師。上一見悅。曰。瞳樞電轉。法貌昂然。真漢天師苗裔也。下詔褒美之。錫燕者再。兼有金縉之賜。丙午。復入覲。京城士庶人求靈符者。日以千百計。侍史不能給。閉關拒之。乃相率毀關而入。公叩齒集神。濡豪篆鉅符。投朝天宮井中。人爭汲之。須臾水皆竭。見土弗止。飲者疾瘳。上嘉之。令作亭井。上號曰太乙泉。及還山。復詔中貴人賜以織文金衣。仍下中書給驛券。畀之。以便朝覲。洪武戊申。上登大寶位。建號改元。公入賀。錫燕於便殿中。命撰制書。授以正一教主。嗣漢四十二代天帥。護國闡祖通誠崇道弘德大真人之號。仍俾領道教事。給以銀印。

視二品。設其僚佐。曰贊教。曰掌書。久之。陛辭而歸。上御謹身殿。從容謂曰。卿乃祖天師。有功於國。所以家世與孔子並傳。以迄於今。卿宜體之。以清靜無爲。輔予至治。則予汝嘉。賜白金十二鎰。新其宅第。己酉春。上召公入朝。踰月。承顧問者六。錫燕者三。三月十三日。上將通誠於天帝。致齋三日。御袞冕服。親署御名於章。勅太常設樂。手授於公。俾咒而焚之。禮成。燕公於文樓。羣弟子饜於別館。復有金縉之賜。庚戌夏。上錄公之功。特勅吏部。改贈公父三十九代天師太玄輔化體仁應道大真人。嗣成爲正一教主太玄弘化明成崇道大真人。改封公母明慧慈順仙姑胡氏。恭順慈惠淑靜玄君。玄君時年八十。朝野以爲榮。是年秋。上復召見。問以鬼神情狀。更給銀印。壬子秋。復頒制誥以寵之。冬十有二月。復召入覲。癸丑春。將還。上命留弟子以司祕祝之事。丙辰。上遣使召公。公忽先期而至。上喜曰。卿之來。何與朕意相符邪。明年之秋。朕將遣使祠海嶽諸神。卿當妙柬清修之士。與其偕來。丁巳夏。公率羣弟子汪弘仁等入覲。錫燕午門之城樓。上舉爵謂公曰。卿宜罄此一觴。勅內侍出御製歷代天師贊示公曰。他日當書以賜卿。翼日。詔公從太師李韓公善長祠嵩山。分遣重臣與公弟子代祠羣望。自公而下。賜衣各二襲。楮幣有差。旣還。錫燕如初。公自返故里。志趣頗異常。一日置酒。與昆弟酣飲。慨然嘆曰。五嶽名山。先子欲遊而不可得。嵩山中峯。乃吾祖得太清丹經之所。今藉天子威靈。幸一至焉。嘯曦景於層霄。邈浮埃於浩劫。吾志將有在矣。君子疑其言未幾。示以微疾。端坐榻上。屬弟子方從義曰。吾無以報國家寵恩。爾等宜左右我子孫。以贊寧謚之化。命取劍印授其子曰。我家千五百年之傳在是。汝其勉之。死生數也。吾之不死者。其光赫熹。四爛寰

瀛。先天地不知其始。後天地不知其終也。舉手作一圓象。嘿然而化。是夕。大崖石崩。聲聞數十里。云。公幼警敏。靈籙文祕之屬。皆不習而通。歲屢旱。禹步召風雷。精神達於冥溲。甘霖卽降。或有爲魍魅所憑者。授以片符。輒潛影不見。公憫兵戈疫癘之餘。沴氣不消。舉行玄壇。舊典修壇壇。建陰陽鼎而鍊度之。其徵驗尤夥。然其天性巨曠。潔而不緇。如超萬物之外。故以沖虛子自號。最愛佳山水。仙踪靈跡所在。必窮幽極深。動至累日忘返。當適意時。欲乘白鶴。與羣仙翱翔紫清之上。其於人間事。未嘗因此少輟。其奉玄君。備極孝養。暨歿。葬祭咸盡禮。度兵禍相仍。傾貲募人爲兵。以捍禦鄉井。人賴以安。公之玄裔。備見世家。茲不載。其曾大父諱宗演。三十六代天師。演道靈應。沖和玄靜真君。妣周氏。某玄君。其大父諱與材。三十八代天師。太素凝神廣道明德大真人。金紫光祿大夫。追封留國公。妣易氏。妙明慧應常靜玄君。其考妣則太玄真人與胡氏也。公字觀宇。娶盱江包氏。宋宏齋先生恢之五世孫。子男子四人。長字初。卽今天師。穎悟有文學。人稱爲列仙之儒。近者入朝。上召見奉天殿。反覆諦視之。笑曰。絕類乃父。寵賚有加焉。次字清。次海鵬。次勝佑。子女子二人。一歸鄱陽王岳。一在室。惟公生乎神明之胄。簡素端凝。用道爲體。而膠轕游氛。無自入於念慮澄靜之久。天光自發。所以受知聖君。入朝京師。天寵便蕃。聲聞四達。至於死生之際。又能不動聲色。超然坐脫。如行者之返故廬。非真有道者。豈易致哉。是宜銘銘曰。

天開日明。真人上升。周流九霄。駕輓作輶。卿雲英英。剛飈泠泠。絳節翠旛。恍其來迎。載稽玄裔。歲踰千齡。五綵交絢。玉笈金經。矧有劍印。奔星走靈。非人莫授。恐干鬼刑。華蓋神君。於焉降精。圓目青瞳。閃如電熒。

入朝帝京。照耀殿庭。進退有儀。金衣霞縑。帝曰。俞哉。爾方外臣。輔朕鴻化。凝真集神。巍巍嵩山。五岳中尊。爾往代祠。執禮如存。庶集靈和。以綏兆民。皇用褒錫。璽書金縉。君臣遇合。玄德之徵。胡爲弗留。飛神竊冥。崩崖墜雷。百里震驚。圓光有赫。四瀾寰瀛。在天爲清。在地爲寧。在人爲貞。是謂三靈。此乃道樞。中黃之局。公能守一。精聚氣凝。不死維神。所蛻維形。白鶴來歸。遼東露零。洞視萬古。後天弗傾。

元贈開府儀同三司上柱國錄軍國重事江西等處行中書省丞相追封咸寧王諡忠肅星吉公神

道碑銘有序

今上皇帝既有天下。憫元忠肅公星吉死節之忠。擢其一子昌。官內廷。遷監察御史。俄超山東按察司副使。昌將行。詣濂泣曰。先公薨於斬盜。盜有義先公者。具棺葬於斬水縣鳳凰山下。家人弗聞。知時兵未靖。各守其境。道阻不通。昌微服跳走。數千餘里。瀕死者數矣。遇今上克斬。始獲至。詢斬人。啓棺北還。以某年月日葬於某地。而昌又獲祿食於朝。皆上之至仁。先公之遺德也。先公之忠。旣載在元史。惟是墓道之碑。未有刻文。敢惟先生是請。翌日濂以聞。詔曰。然。星吉之忠。朕實知之。卿其勿辭。乃考論其事。曰。謹按元贈開府儀同三司上柱國錄軍國重事江西等處行中書省丞相追封咸寧王諡忠肅星吉。字吉甫。河西人。贈榮祿大夫河南江北等處行中書省平章政事上柱國追封秦國公。改封雍王。朵吉之曾孫。贈榮祿大夫陝西等處行中書省平章政事上柱國追封趙國公。改封邠王。擲思吉之子。其先三世以語言材藝事太祖憲

宗世宗爲怯烈馬赤。譯諸國言。後皆以公貴。封王。曾祖妣倫徹。祖妣阿程。妣順祖。皆從其夫。封國爲夫。人。改封王夫人。公兄弟六人。於次爲三。少騫然不可犯。武宗時。召見便殿。襲怯烈馬赤。事仁宗於潛邸。仁宗卽位。雅宜公久不改官。英宗知公材。延祐七年十二月。授承直郎。中尙監丞。賜中統鈔千貫。給校尉。十人。專道而行。監尙御用物。公謹持出納。不可勢屈。中官貴臣。手無符勅。絲毫不放。英宗奇之。至治二年二月。遷右侍儀。同修起居注。命龍慶州達魯花赤脫歡。以女妻公。賜鈔三萬貫。爲聘資。寔得眷近。公每侍側。中外利害。乘間進說。無虛時。泰定元年六月。拜監察御史。階奉直大夫。丞相帖木迭兒。紛更朝政。御史大夫倒刺沙。狼據中臺。公奮章劾之。朝廷凜然。畏公。三年七月。陞朝列大夫。引進使。知侍儀事。四年九月。進侍儀使。階朝請大夫。文宗天歷二年八月。拜江南行御史臺治書侍御史。時大夫阿思兒蘭海。漣有能聲。公至。萬口移譽於公。大夫聲頓寢。詔賜衣一襲。上尊二朋鈔五千貫。至順元年。遷河東山西道肅政廉訪使。殫姦剔穢。煦其朽枯。境內帖息。三年二月。復拜治書侍御史。治陝西行臺。未至。召還。同知中政院事。六月。改同知功德使司事。順帝元統二年四月。淮西北道肅政廉訪使告闕。僉擇其良。以公爲之。一道稱治。明年。徵拜大都路總管府。達魯花赤輦轂之下。權倖肆橫。法滯不行。公操其紀綱。風迫雷斷。不問誰何。姦宄帖然屏伏。至元二年六月。擢嘉議大夫。大府卿。大府近且貴。莫敢鈎覈。闔豎攘竊。斂散無藉。吏緣爲私。公較櫛隱蔽。立簿計數。吏畏若神。將作院累歲乾沒。綺繡之屬。一萬五千縑。悉責償之。知崑山州事。管某上書誣平江路總管道童。詭報歲災。帝命公察情否。初。道童以廉正治。其屬官不能堪。故誣之。且倚前

翰林學士阿魯灰爲援。公驗得其狀以聞。卒坐二人罪。三臺交章薦公。五年二月。特授資善大夫都留守。仍兼大府卿。益虔於職。談其美者。日以上聞。帝曰。不可無旌。以勸奉職者。六年三月。就加榮祿大夫。未幾。帝幸大府。見公所爲。條法精密。諸藏皆盈。有黃金束帶之賜。時微雨。公立階下。命侍臣取御服油衫加公身。至正二年十二月。陞宣徽院使。四年二月。改湖廣等處行中書省平章政事。省控治五溪洞蠻土酋鹿馴家暴變。幻百出。每視省臣臧否。以爲叛服。公禁戢內兵。勿擾其境。布約施惠。化其悍猾。效貢奉職。比於近縣。十二月。以中政院使召還。六年六月。賜金虎符。轉海西遼東哈思罕等處打捕鷹房怯恰口萬戶府達魯花赤。十月。遷將作院使。後二月。太府闕卿。再入太府。兼將作使。階超光祿大夫。七年十月。遷宣政院使。明年三月。拜江南行臺御史大夫。時承平日久。官恬吏怠。漫無倫紀。公至。擇剛明御史行十道。糾劾貪邪。疏拔冤滯。憲司隸卒。盤據爲虐者甚衆。公下令屏斥之。俾州縣之卒。更月入直。民歡樂之。建康城北有宋王荆公墳。寺僧世守既久。視爲己有。王氏孫伐山木。僧執送官。官將以盜論。事上公。公怒曰。王氏山。王氏孫伐之。何謂盜耶。卽歸山於王氏。而逐僧出之。秦檜裔孫斂民田。羣訟不決。公問寮屬曰。檜是何人。寮屬以姦臣對。公閱檜傳。大署其狀曰。檜之誤國。千載有餘戮。矧茲遺胤。敢爲民害。盡斷其田於民。公之明決。皆此類。湖東道僉事三寶注。廉介不阿。御史以私謁之。不聽。輒以事劾之。章至公所。公曰。鴉敢擊鳳耶。奏杖御史。脫脫丞相與御史有連。銜公。十年五月。移湖廣行省平章政事。湖廣地並江北。威順王寬徹不花田獵。蹂踐稼穡。起廣樂園。萃名娼巨賈。以罔利。有司莫敢問。公至。求見王。關啓右扉入。公引繩床向

中門坐。叱閹曰：吾受天子命爲藩大臣，烏可以小門入我閹懼，告王，乃啓中門。導公入，公拜謁畢，起言曰：王帝室之胄，與國同體，不爲天子養民，而獵野獸，悅婦女，以爲民病。臣竊爲王危之。王投几降坐，執公手謝曰：非公不知此，悉罷其所爲。有胡僧持官府柄，橫甚，公捕其妻妾十有八人，籍於官，寘僧於法。由是民得吐氣。十二年，妖賊徐真一等起汝穎，蔓延湖湘間，勢甚熾。時武備久弛，公咨於衆，或以老將鄭萬戶有材略對，公乃令募士兵，繕城池，修戈甲，起部屬以禦賊事。賊聞有備，遣其黨千餘詣軍門降。公謂鄭曰：此誣也。鄭設伏受降，誘而殲之，縛其酋六百人，獄以俟命。會公召爲大司農，平章和尙受賊賂，繫鄭而釋其縛。縱之。明年正月，賊乘懈襲武昌，六百人自內爲應，城遂陷。城中人泣曰：星吉平章在，吾屬豈爲俘乎？公至都，入見，陳致賊狀，帝喜，賜食及錢三萬貫，脫脫不悅，奏爲江西省平章政事，員外置吏卒，趣遣之。官至江東，有詔會浙西平章政事，不顏帖木兒，南臺中丞蠻子海牙守江州。時江州已破，江以西道不通，公開省太平，募人開道，持羽書走江西徵兵，未返而賊焰漸逼，調廣德軍寧國之兵僅一百五十人，賊號百萬，衆皆沮懼。公曰：勿憂，彼賊我王師，彼豈吾敵？乃貸富民財，募強壯爲兵，初行臺募兵，人給十五千，無至者，公予五十千。三日，從者逾二千人，公曰：可矣。卽擐甲胄，舟二千人，鼓行沂江而上。四月，與賊黨戰池州，斬首數萬，復其城。至魯港，威順王之兵亦至，士氣益張。賊據銅陵，拔柵夜遁去，又復銅陵，蒐其黨得二千餘，盡戮之。復遣裨將陸行，遇賊白馬灣，又敗之。賊走淮西，公部分諸將卒兵躡其後，及於白湄，賊窮，列陳迎戰。公麾左右策馬雜射，薄其軍，擒僞相周驢，賊潰不能列，俘其衆五千，奪舟六百艘，乘勝奔擊之，賊溺死。

者蔽江。江水爲白。於是道稍無阻。已而賊擾池。公率衆至池。遇五游騎於苦竹嶺。斬其二。鞠賊安在。聞其衆三百屯貴池。襲之散去。復其邑。賊復攻陷石埭。殺尉。公夜趨之。賊陳其衆三千於縣西岳溪橋。有三會。一乘驢。二躍馬。突前挑戰。乘驢賊驍勇無敵。軍中常畏之。公引弓射之。應弦而仆。再發再斃。二會後師乘之。賊棄城走。其散卒千餘。焚掠縣西鄉。公復追出境。賊忽將舟師二百艘。順流來攻。公命萬戶王惟恭禦之。戰方酣。麾舡從旁橫擊。賊破走。乘勝進望江清水灣。居三日。偵者告賊舟四百。順風引帆。直指我軍。諸將失色。公曰。無傷。吾有以勝之。乃偃旗伏橫港中。風急水駛。賊舟不得泊。奄忽電過。過且盡。命舉旗擊帆。鼓譟出其後。賊驚駭不能弓。官軍奮擊。遂敗之。擒卒二百。獲其舟艦器械甚衆。進克建德縣。時賊久圍安慶。聞其黨敗。而蠻子海牙亦至。焚營解去。公且行且戰。復湖口及江州。賊巢據彭澤。公欲攻之。而江湖倉無一日糧。乃諭民輸財。資士卒。俾惟恭守小孤山。而自駐番陽口。扼江湖要衝。以圖恢復。然亂已久。湖廣江浙多敗。江西亦無援助者。轉戰六百餘所。將兵日衰。耗困疲。財粟亦且殫匱。或請去就食東南。圖再舉。公曰。吾受命守江西。此江西地也。死則死。此去將何之。九月二十日。賊知公兵食俱竭。帥大舶載葦蔽江而下。杜上下流。縱火夾攻。公麾兵殊死戰。死且盡。從子伯不花將親兵數千人戰。亦死。公猶堅坐。大呼曰。殺賊殺賊。俄而賊射公中目。仆舟中。賊素識公名。不忍害。輿置密室中。明旦少蘇。賊饋食。公臥叱去。或以刀脅公降。公罵曰。狂賊我國之大臣。恨不能殺爾。而爲爾獲命也。何謂降爲。大罵不已。賊終不敢害。環卒守公。凡不食九日。忽自力起。北面再拜曰。臣力竭不能報國。敢不死以辱命。言畢而絕。時十二年九月。

二十九日也。年五十有七。卒後二年。監察御史嚙嚙等請褒其義。乃贈今官。而諡忠肅云。公先娶卽脫歡女。諱奴倫。生一子而卒。後娶郭氏。中書平章政事不花之女。俱封趙國夫人。子男五人。曰刺哈咱。識理公。卒後。特授榮祿大夫。利國監大卿。曰答兒麻八。大中大夫。僉遼陽行樞密院事。其三卽吉昌。初名達爾麻。識里。上賜今名。曰寶山。曰寶座。女一人。濂昔論次元史。未嘗不歎其敗亡之易。由於內外壅絕。將相非人。使然也。當亂之始興。誠得數萬之兵。使一猛士將之。可立見其撲滅。而顧依違不斷。養致大變。其中有足任如公者。又卒俾之孤危無援。不足以成功。豈非自致哉。惟公忠義果敢。出於天性。歷踐要職。聲績彰明。提千百未試之卒。轉戰湖江間。復城破邑。懾敵人之膽。雖勢孤力微。大功不竟。然忠義之氣。猶足以立萬世之防範。使亂臣賊子懼。宜乎皇上褒其後人。而以銘命濂也。其辭曰。

朔河之西。正氣烈烈。摩盪日月。乃生英傑。其人謂何。爲忠肅公。偉貌長髯。猶人中龍。當元盛時。出入禁闥。一志小心。不自矜伐。歷事三宗。登於顯融。正色厲言。以折姦兇。旣司行臺。亦尹京邑。貪邪宵遁。鬼神晝泣。湖湘之間。名王所都。納貨掄姝。烝黎告瘡。公聞盛額。盛服往謁。以笏畫地。再拜辨說。弛其嚴威。謝以巽辭。予實無良。非公不知。盛極而弛。孽生覺起。帕額持戈。蔓延千里。公駭而咨。聘帥與謀。始剪始屠。天子召予。匹馬北馳。狐鼠相賀。大城巖巖。一蹴而破。民泣且號。吾實不辰。公如在斯。豈爲盜人。當亡載詢。亂實誰致。稽首告言。權臣喪氣。公喪其氣。彼斥公身。朝辭暮行。禦魍魅羣。公曰予家。世承國恩。先臣在天。敢負吾君。我兵二千。以義爲勇。盜雖如林。逆不能衆。旣復池陽。遂徇銅陵。呼聲如雷。江水晝凝。左誠右擒。轉戰日亟。

扼江湖咽。以掃南極。氣吞逆雛。奈力之痛。孰謂猛虎。制於羣狐。人或謂公。盍往他所。公曰。受命死則於此。烈焰燭雲。勢無全軍。志在誅巨。罵聲益振。羣酋羅拜。來饋飲食。叱之不御。以死報國。公死者身。不死者名。相贈王封。以媿苟生。豈惟當時。愈久愈著。元廟旣墮。公尙有子。公子克孝。天子是庸。匪惟私公。以勸盡忠。雖公至忠。天子至仁。刻辭豐碑。垂訓萬年。

毛公神道碑

奉國將軍僉大都督府事毛驥來謂濂曰。先公以至正辛丑正月朔日。棄遺諸孤。某月某日。遂畢窀穸之禮。迄今已十八春秋。滄蒙天寵之加。賁及泉壤。而墓上之石。未有銘辭。大懼無以昭君賜而示子孫。願爲備書其故。俾刻焉。按狀。公諱麒。字國祥。姓毛氏。世居鳳陽定遠縣之昌義鄉。生平負英氣。多謀略。人恆敬之。壬辰之夏。汝潁兵大起。所在郡縣皆相挺爲亂。今上皇帝龍興臨濠。憫生民之塗炭。持三尺劍。出而救之。一呼之間。從者數萬。直趨定遠之池河。初縣之大姓陳氏。與公謀招健兒爲兵。屯營其地。挾縣尹某爲帥。作保障計。聞大軍且至。皆棄妻孥。作風雨散去。公獨扶尹共詣轅門。款附上。遙見之。令左右問曰。爾爲何人。對曰。定遠尹也。扶尹者何人。對曰。縣民毛麒也。上壯公所爲。乃召之前。指謂侍臣曰。衆皆潰。而麒獨降。非有識者邪。於是寵遇優渥。朝夕俾公侍膳。與共計征討之事。健兒聞公在幕府。亦先後出降。上取滁。州。擢公行軍總管府經歷。司其倉廩。兼掌晨昏。歷以鎮將帥之失佐者。未幾。取和州。軍威益振。上以建國之初。唯兵食最急。仍命公謹滁州倉。乃帥師渡長江。太平望風乞降。遂開江南行中書省。徵公還。陞爲郎。

中當是時。上之左右。唯公及太師李韓公。尤被簡任。凡政令之敷布。餽餉之轉輸。羽檄之交馳。皆二公相與協贊之。及建康下。遂定鼎焉。分道帥師。日以獻捷聞。復陞公爲參議官。戊戌冬。上親征婺州。公實權署中書省事。小大庶政。咸出公營度。人情胥合。文武無間言。上將大委任之。而公以病告。上臨其家。坐榻上執手問所苦。且勉其善自愛。如是者凡三。訃聞。宸衷憫悼。錫贈有加焉。且詔參軍胡深。選葬地於江寧虎頭山。及靈車就塗。上復躬御翰墨。作文一通。御鎮淮橋而祭。慟哭良久。直至處所。視其下棺。始還。公之子驥。時備宿衛。上念公弗置。俾驥就儒師學。親自訓督之。命爲飛熊衛管軍千戶。轉振武羽林二衛。驥感上恩。自謂千載一時。夙夜思立身揚名。以報國顯親爲務。會大兵征漢鄂。定襄沔。下吳興。俱從征有功。洪武元年。上郊皇天。卽帝位。國號大明。在廷之臣。皆驗勳進官。擢驥宣武將軍。僉羽林左衛親軍指揮使司事。仍追封公西河郡伯。封公妻周氏西河郡君。大將軍徐魏公奉詔征中原。而驥又從行。直搗燕薊。元君出奔。天下於是大定。論功行賞。陞驥懷遠將軍。同知羽林左衛親軍指揮使司事。世襲其職。得推恩二代。時重定封贈例。司封據令更贈公懷遠將軍。同知親軍指揮使司事。周氏封淑人。公父文政。贈明威將軍。親軍指揮使司副使。母朱氏。贈德人。驥室劉氏。先封西河郡君。至是亦更封淑人。已而驥進官羽林左衛親軍指揮使。階昭勇將軍。滕州段士雄反。驥帥師討平之。倭奴入寇浙東。沿海郡縣皆失寧。驥會浙江太倉諸軍。捕斬五百餘級。獲海舟一十二艘。倭奴遠遁。入奏奉天殿。上大悅。曾未幾何。驥復超奉國將軍。僉大都督府事。加贈公僉大都督府事。階奉國將軍。而明威公亦加昭勇將軍。羽林左衛親軍指揮使。朱氏加

淑人周氏劉氏皆夫人。繼室張氏亦封夫人。公生子九人。驥其長也。次曰駿。某階羽林衛千戶所鎮撫。曰駒。某階金吾左衛千戶所鎮撫。曰某。曰某。曰某。曰某。女三人。二先卒。一嫁宿衛舍人沈俊。孫六人。曰振武。曰應孫。曰承安。曰鎮住。曰東平保。曰寶慶。嗚呼。天造草昧之時。六合雄爭。未知鹿入誰手。昧者往往失於所憑依。而公獨能炳於幾先。識真主於龍飛之初。扶攜臣服。獻計宣勞。以佐興王之運。豈非豪傑之士哉。及乎神武四達。方域內附。皇上崇德報功之心。惟恐有弗及。故當時開國元勳。無不分茅胙土。鐵券金書。傳及來裔。奈何公之早世。不得盡其才而與之並。其命也邪。雖然。驥之雄略超羣。蓋奇勳出入。扈從上簡帝心。爵位之顯融。贈卹之便蕃。尙方新而未艾也。公雖沒。亦可以無憾矣。銘曰。

猗歟毛公。沈毅而雄。元運將終。亂如聚蠹。公奮而興。使民爲兵。執旗一呼。從者如星。我州我閭。我保障之。俾全其生。寧顧我私。上天厭亂。特命真人。驅雷駕雲。廓清妖氛。公聞曰噫。天胡可違。附鳳攀龍。茲惟其時。我志先定。敢徇輿情。上謁轅門。稽首以迎。上嘉其忠。寵賚日優。談笑折衝。帷幄運籌。羽檄星馳。饋餽弗遺。是馳是驅。以壯我王師。飛渡大江。軍威洸洸。達於四方。無敵不降。自參戎閫。遂贊中書。拾級而陞。漸見赫赫。卉木方榮。嚴霜折之。大火始然。河水滅之。天若假年。勞烈執倖。貂蟬朱紱。豈不公侯。命也止斯。人其奈何。中外聞之。孰不嘆嗟。公雖云亡。有子慨慷。出入禁庭。侍衛帝傍。勳名日崇。馳典日殷。天光照臨。輝輝焯焯。難逢者時。不朽者名。名著實并。登諸汗青。莫堅匪石。以礪以磨。史官造銘。永鎮山阿。

元故國子祭酒孔公神道碑

堯舜禹湯文武及孔子。德皆聖人。惟孔子不得位而功最盛。天於恆人有一善。且昌其後昆。況德充天地。功施萬世。而身不食其報者乎。堯舜禹湯文武皆王天下。故子孫受其社有限。孔子無位。故餘慶遺澤。被其子孫者無窮。自斯民之生。未有若孔子之德。而無位者也。亦未有孔子之傳世久遠。而襲爲封君者也。嗚呼。天之報聖人。其在茲乎。公諱克堅。字璟夫。世家魯之曲阜。孔子五十五代孫也。曾祖曰之厚。贈大夫。濟寧路總管。輕車都尉。祖曰浣。累贈通議大夫。禮部尙書。上輕車都尉。皆追封魯郡侯。父曰思晦。嘉議大夫。襲封衍聖公。累贈通奉大夫。河南江北等處行中書省參知政事。護軍。追封魯郡公。諡文肅。曾祖妣女真氏。祖妣李氏。妣張氏。皆追封魯郡夫人。公少廓達通敏。日誦千餘言。始冠。遊學成均。通春秋左氏傳。文肅公薨。襲封衍聖公。階嘉議大夫。元重紀至元五年。上疏請修飾廟像。順帝可其奏。賜山東歷日錢之半。給其費。命監察御史族人思立持楮幣二萬五千緡。勒碑以紀成績。至正六年。中書謂公爵與階不稱。奏陞之。制授中奉大夫。易銅章以銀。十五年。平章政事達世帖木爾薦公明習禮學。徵爲同知太常禮儀院事。以子希學襲公爵。是年冬。帝親郊。公攝太常使。盛服襜然。登降有容。觀者稱爲達禮。御史大夫雪雪言。公才宜近待左右。拜中臺治書侍御史。公辭歸。明年。拜山東道肅政廉訪使。既受詔。復辭。會山東兵亂。公率家人北行。次蕪城。丞相賀太平奏召公爲集賢直學士。希學爲祕書卿。遣使者卽蕪城起之。公至燕都。處盜毛貴犯畿甸。且逼廷議。棄燕遷關中。公曰。天子當與社稷宗廟俱爲存亡。烏可棄而他之。今勤王之兵頗衆。與之決戰。盜可平也。如公言。盜果敗去。十九年。遷禮部尙書。知貢舉。時四方士避亂。多集都邑。公

請設流寓科以取之。是年冬擢陝西行臺侍御史李思齊及察罕帖木兒二軍爭秦隴相攻。朝廷不能制。陝西行省丞相帖里帖木爾納思齊降將命張良弼禦之。公及中丞袁渙諍曰。不可。二軍不敢舉兵犯奉元。豈其力不足哉。特以無名耳。今納其叛將而出兵禦之。是引虎使噬也。丞相不從。渙亦被劾去。公怒曰。謀之不善。亂且至矣。遂自劾而歸。月餘。二軍及良弼戰於鹿臺。奉元果陷。二十二年。除國子祭酒。帝賜上尊。太子書大成殿額以賜。公以世亂不樂居位。竟謝病歸闕里。營別業城南以居。後起公爲集賢學士。資善大夫。不就。復以公爲山東廉訪使。卒不起。二十八年。皇上手詔。趣公入覲。待以賓禮。而不名。賜以廩祿。不煩以職。郊祀必致膳肉。撫勞甚至。洪武三年春。以疾告。遣中使存問。疾篤。詔還公於家。給驛以行。賜白金百兩。文綺八端。他餽物稱是。三月二十八日。次下邳新安驛。薨於舟中。壽五十有五。希學奉喪歸。以六月十三日葬於孔林。去孔子墓若干步。公寬厚樂易。事親有禮。遇族黨有恩。與人交不爲掩覆。計度一以誠信。豐厚美髯。容止甚都。順帝以福人稱之。公娶張氏。濟寧路總管子仁女。封魯郡太夫人。丈夫子九人。長卽希學。次希說。希範。希進。希麟。希鳳。希順。希尹。皆元國子生。希贊其季也。女一人。適某某。孫男九人。曰訥。曰証。曰某某。女五人。希學今資善大夫。襲封衍聖公。每歲朝正於京師。上寵錫之甚厚。以袁渙狀來請曰。先公沒今十年。而墓道之石無文以刻。恐休德不聞於來世。人其謂何。濂嘗獲識公。且與希學善。雖老矣。其忍不銘。銘曰。

天命大聖。爲萬世師。廓幽昭潛。兩施日輝。功加堯舜。位則不有。斂其遺澤。以昌厥後。歷年二千。有興有亡。

五十餘世。封褒相望。自侯而公。愈遠彌貴。桓圭袞衣。肅將祀事。惟公紹休道。大且文人。曰休哉。聖師之孫。入爲秩宗。左禮右樂。格於幽明。上下允若。亂兵趨燕。宗社震驚。君臣合謀。棄而西遷。公曰不然。君死社稷。以正伐亂。勝不以力。王師焯焯。如虎如貔。盜遁難巨。公實啓之。關陝之間。將驕胥噬。彼謀不臧。以水止潰。公謂元戎。世方興亂。無失厥防。以速其叛。言臧不從。不臧是爲。禍將迨身。云何弗歸。璽書迎拜。俾掌邦教。大訓宏謨。敷聖之道。土宇日墜。位其可居。退修於家。琴瑟詩書。皇明御極。取聖爲則。陟降帝庭。禮儀有翼。生享其榮。死篤其承。云誰致然。聖澤休明。惟聖之澤。如山如川。有址有源。以永厥傳。繼聖惟賢。守位惟德。昭績垂聲。後嗣是式。

墓碑

東丘郡侯花公墓碑

皇上渡江之六年。庚子夏閏五月癸酉。僞漢主陳友諒以舟師入寇。圍太平。行樞密院判花公率麾下三千餘人。結陣迎戰三日。賊不得入。乙亥。城中乏食。公士馬餽。城陷。賊縛公急。公怒奮身大呼。縛盡解。起奪守者刀。殺五六人。罵曰。虜非吾主敵也。曷不趣降。賊怒碎公首。縛於舟檣。衆射之。公至死罵賊不少變。已而賊犯龍江。上命諸將力戰。賊敗遁去。後五年甲辰。上卽吳王位。追封公東丘郡侯。又十六年。其子僉水軍左衛指揮司事煒泣曰。先公歿今二十年。無文銘於神道。竊恐忠烈不白於後世。敢請。惟公勳業始卒。宜載國史。余嘗待罪太史氏。不敢以耄辭。公諱雲。姓花氏。世爲懷遠人。自考以上。姓名皆亡。莫知遷徙世。

次。然皆不顯。公少孤。隨母嫁張氏。貌偉而黑。驍勇絕人。儕輩畏服之。歲癸巳。仗劍謁上於臨濠。上奇其材力。俾將兵略地。所至輒克。破懷遠城。口擄其帥以歸。進攻全椒。拔之。羣寇據繆家寨。公俟夜襲之。寇散走。上將取滁州。單騎前行。遇賊數千人於道。拔劍驅馬衝其陣。而過。賊驚曰。此黑將軍勇甚。不可與爭鋒。兵既至。遂克滁。甲午。從上取和州。得卒三百。以功援管勾。明年乙未。率所部先渡江。上克太平。以公忠勇。可信任。命宿衛左右。丙申。上破集慶。公得兵千人。陞總管。徇鎮江。丹陽。丹徒。金壇諸縣。皆下之。過馬馱沙。劇盜數百。遮道索戰。公且行且鬪。三日夜。皆禽殺之。授前部先鋒。攻常州。拔其城。駐守牛唐營。夏六月。立行樞密院於太平。遂拜公院判。階安遠大將軍。丁酉春正月。克常熟州。獲卒萬餘。命公將之。秋七月。以兵三千之寧國。陷山澤中者八日。羣盜蟠結梗道。公操矛鼓譟。出入營壘間。斬首千百計。而身中一矢。還命守太平。後四年。遂卒。卒時年三十有九。夫人郇氏。公與僞漢戰時。一子方三歲。夫人以牲酒祭家廟。會家人泣曰。今城且破。吾夫忠義人。必以身死之。吾夫死。吾必不獨生。然不可使花氏無後。嬰兒在。若等善撫育之。聞公就禽。夫人赴水死。年甫三十有五。待兒孫氏。瘞夫人屍。遂抱兒以行。僞漢軍擄之。至九江。軍中惡養小兒。孫氏以兒授漁家。屬之曰。此兒良。宜善視之。是年冬。王師伐僞漢。漢敗。孫氏至漁家。視兒在。矚漁人出。竊負以走。夜宿陶穴中。天曙。脫簪。僞舟渡江。遇漢潰軍。奪舟棄江中。孫氏抱兒。遇斷木浮至。附之。入葦洲。採蓮實哺兒。七日不死。夜半聞人語聲。呼之。逢老父。號雷老。告之故。與其俱行。明年辛丑春二月。達上所。孫氏泣抱兒拜上。上亦泣。實兒於膝曰。此將種也。賜雷老衣。遣之。復其徭。已而令人追之。忽不見。兒

八歲侍皇太子就學。年十三授虎賁右衛副千戶。後七年拜今官。卽煒也。煒於洪武丁巳偕孫氏至太平。奉夫人骸骨歸。乃束草像公。以二月己未合葬。上元縣南五十里之水橋。嗚呼。觀公之死。賊與妻妾之報。公可以知公之爲人矣。天不殄其後。豈不宜哉。銘曰。

雲雷遶屯區。字分篤生眞。人鎮乾坤。騎龍鞭霆下天門。前翼後衛。蒼若雲。誰其最雄。花將軍。力驅智駕。敵萬人。蹂躪羣盜。猶磨磨。大刀長戟。屬囊鞬。左麾右刺。流電奔。緋衣緇弁。魏虎屯。駐馬飲江。江水渾。吳楚之域。殺氣昏。手挽天河。洗妖氛。軍聲隆隆。然若雷震。遭者膽落。兩足蹲。元戎開府。大江濱。腰佩兵符。威令尊。控制上游。爲國藩。僞漢恃力。不圖存。建旗揚帆。事鏗鏗。艤艦蔽江。躡鈎援。槌牛享士。士氣伸。馳馬督戰。寧顧身。賊焰熾。若烈火焚。大戰三日。勢愈殷。單騎赴之。齒嚙齦。怒髮上指。目吐烟。汝賊兇頑。犬與豚。願醢汝肉。一口吞。賊慙耳。塞不忍聞。至死不屈。酬國恩。飄然乘雲。叩帝闈。請爲厲鬼。扼賊元。賊當殛死。洗厥冤。天子下詔。褒忠勳。東丘立侯。賁九泉。孤兒保育。寵便蕃。不墜宗祀。天所敦。生爲烈士。死明神。神靈在天。光焯焯。嗟爾來觀。萬子孫。繼忠思。孝慎勿設。弗信請考。太史文。

故嘉興知府呂府君墓碑

元至正之季。民反處州。爲盜。轉掠而東。陷永康。發諸縣釋騷。弗寧。永康太平里大族呂君文燧。散家資數千萬。與弟文燁合謀。募里壯強子弟。得三千人。將之與盜屢戰。盜敗走。復其邑。斬獲甚衆。呂氏之聲聞東南。朝廷三授以官。皆辭不受。用事者聽讒殺其弟。卒不敢怒。而爲之盡力。大臣義之。承制表其閭。而復其

家。娶之巨室。細民幸不遇盜者。悉歸功呂氏。是時永康有呂氏。隱若巨鎮焉。今上皇帝既克婺。君族人籍兵甲以君名詣轅門降。上大喜。特立永康翼。以君爲左副元帥。兼知縣事。時君以事留杭未返。命其弟文烜攝之。君還。復召爲庸田司經歷。改中書省管勾江西行省都事。權知廬州府。至官三月。浙西平。更授嘉興知府。累階某大夫。松江民作亂。襲嘉興。君覘知之。走使者告李曹公文忠。賊始據城。曹公兵卽至。遂就擒。諸將欲屠城。君爭曰。據城者賊也。城中民何罪。釋不屠。民德之。滿三載。入朝奉詔持節諭閩。婆國。洪武三年十一月次興化。有疾。十六日卒於驛舍。四年十二月某日。歸葬東陽縣興賢西丘之原。年五十四。君有德於鄉。鄉人聞其卒。皆哭泣相弔。喪歸。耄倪迎拜於道。數十里不絕。卒之明年。嘉興佐貳以下坐鹽法死者數千人。有司以君嘗署名公牘。例籍其家。上特詔歸之曰。吾知呂文燧誠信人。必不圖姦利。且歿於使事。可念也。時呂氏家逮繫縣獄。鄉人哀之如親戚。及詔歸其家。乃皆舉手相賀。君子由是知君之德及人者深也。君字用明。文燧其名也。其先有諱致者。自河南來遷。致玄孫浩。上書宋孝宗朝。脫父兄於詔獄。孝宗崩。行喪三年。浩弟源以行義旌門。皆有惠於閭里。源玄孫鑰。仕元爲永康尹。君曾大父也。大父汲。父機。母某氏。初君之大父。嘗脩上世所立義田。以食族人。置學以教子弟。至君踵其志。卒成之。君爲人如儒夫。至其奮發於義。不顧利害。必達乃止。蓋其所從來遠矣。君娶戚氏。三子曰堂。埭。垵。垵後季父文燭。六女。其三人適同邑。胡海。金華。戚誠道。東陽俞文璉。餘未行。孫男二人。堂旣葬君。乃謀於弟曰。先子之友固多。其同朝仕而知先子者。唯太史宋公。太史嘗銘天下賢公卿大夫。其言可傳信。苟以墓上銘爲請。必不忍。

辭乃以君族弟熒狀來請君之政蓋多可稱余不能知然其最大者活永康嘉興之民書其大使人可推知其餘也銘曰

人之所爭智名勇功或易於始而艱其終呂君之興秉義孔偉散金聚兵以彌狐鼠既克有成不居其名錫命者三辭而弗承匪徒辭之以俟神聖黃鉞臨城解甲請命左館將符右珮縣章季也攝之於君有光起司庸田亦佐方嶽章服有儀蔚爲邦伯自廬而吳千里是綏相其良姦以撫以誅儉氓跳踉弄兵陷郡陰檄王師擒斬以徇將怒謂君亂民可屠君爭不從萬家獲甦不躋於崇而淪於遐吏操深文幾隕厥家家之再完由天子明天子不遺由君之誠君德甚多鄉人是思載德登碑於以悼之

贈中順大夫鎮江知府徐公墓碑

皇上卽位之十年詔曰光祿卿徐興祖慎事小心在朕左右二十有五年未嘗有過非其祖父之教曷以致斯其準恆制寵贈之官以勸奉職者於是吏部承詔贈其大父餘慶中順大夫應天府丞父景福中順大夫鎮江知府祖妣朱氏贈德人妣高氏贈淑人興祖既祇奉制書告於墓下復謂余曰吾祖父世有醇德祖之事稍遠弗能悉知知而悉者惟吾父而已吾父之德吾知之吾子雖知之弗悉也至於吾孫又不若吾子之知則遂忘矣苟不託於文辭何以示後之人使知所自敢以累執事焉余與興祖同朝甚久不獲辭徐氏世爲建康人國初易建康爲應天府今爲應天之江寧人公諱景福字某諱餘慶之子諱守禮之孫平居愿貌寡言事親先事揣意取其歡欣兄眉壽析產出居朝夕往省問其缺乏及所好而饋進之

並市肆備百物以通時之有無。不過求銖兩息。遇人不問長少。卑躬悅色。懇篤誠信。出言惟恐傷之一揖垂首。幾欲及膝。久之然後起。與俗無怨。聞喧冒聲。輒引避。人告以求利。則曰。苟足可矣。非敢求也。或尤其太同。則曰。誠以待物。同非所知也。由是里閭咸稱之爲善士。公旣以此自治。生子亦以是教之。年若干。以某年某月日卒。某年月日葬於聚寶山府丞墓側。妻卽淑人高氏。耐焉。高氏柔嘉有則。年若干。以某年月日卒。子男三人。長紹祖。次卽興祖。次敬祖。興祖瀄篤遜謹。由尙食局副使四遷至今官。階中順大夫。爲上所信任。賜以第宅土田。而孫男五人。欽。鑑。鈞。仁。義。皆謹飭習禮。欽復擢爲從仕郎。掌鹽署丞。曾孫男女又十餘人。君子於是知公積善之報未已也。嗚呼。爲善者觀於徐公。可以知勸矣乎。銘曰。

天博而穹。厥聽孔聰。善祥隱殃。咸以類從。孰謂不知。譬其幽遠。棄不爲善。其胤卒殄。有察其然。善集於身。身或弗昌。昌在後人。懿惟徐公。嗜善忘利。豈必多言。躬行於事。純孝篤誠。於父於兄。小智私謀。我則不能。里譽閭稱。公誠善士。不顯其身。以遺厥子。厥子如何。冰潔璧溫。玉食是司。以奉聖君。帝嘉奮勳。俾長光祿。金帶朱衣。其儀甚肅。殿門嚴嚴。不敢顧瞻。退食於家。默無一談。帝曰。爾賢。祖父善教。錫以峻爵。以勸忠孝。迺贈徐公。守彼鎮江。徐公有父。佐於鄉邦。制書煌煌。丹墀如日。宰木祠垣。燁然動色。鄉隣歎咨。始實弗知。積善致斯。胡寧不爲。徐公有善。子食其報。人孰非公。賢者是效。

故翰林侍講學士中順大夫知制誥同修國史危公新墓碑銘

嗚呼。翰林侍講學士中順大夫知制誥同修國史危公。享年七十。以洪武五年春正月二十三日。卒於和

州含山縣之寓舍。其年二月十五日。權厝於含山。某年月日。始遷葬金溪白馬鄉高橋之原。其子於反於深懼公之功行世系。不昭白於天下。晝夜兢惕。自爲狀二萬言。來謁新墓之銘。濂守官少暇。久未克論。譔十年春正月。蒙恩致政東歸。私念公相知特深。在前朝時欲引薦入史館。及今待罪禁林。實與公爲同僚。相得甚驩。於是評騭羣行。而勒文於碑。其文曰。公諱素。字太樸。姓危氏。危本姬姓。周武王庶子某。生而手中有文曰危。因賜姓危氏。封於新。其後居光州。晉永嘉中。建州刺史京遷建昌之南城。唐黃巢之亂。全諷與其弟仔倡赤手起兵。擒巢黨柳彥章於象牙潭。擢撫州刺史。累官金紫光祿大夫。檢校太傅。封南庭郡王。南庭之後。復遷撫之金溪白馬鄉。譜圖亡。竟逸其名。南庭十五世孫宋景定三年。進士通直郎知臨安府仁和縣事。元累贈中奉大夫。江浙等處行中書省參知政事。護軍。追封汝南郡公。炎震公之曾大父也。累贈資善大夫。河南等處行中書省左丞。上護軍。追封臨川郡公。龍友公之大父也。累贈榮祿大夫。江西等處行中書省平章政事。柱國。追封豫國公。永吉公之父也。曾祖妣王氏。彭氏。妣劉氏。皆封郡夫人。郡之名如其夫。母劉氏。黃氏。並封豫國夫人。公自至正元年。用大臣交薦。入經筵爲檢討。公年已四十一矣。五年。改承事郎。國子助教。七年。除應奉翰林文字。同知制誥。兼國史院編修官。未上。轉宣文閣授經郎。兼經筵譯文官。階文林郎。明年。復入翰林爲應奉。十一年。遷儒林郎。太常博士。十三年。轉奉訓大夫。國子監丞。擢兵部員外郎。十五年。陞奉議大夫。禮部郎中。拜朝散大夫。監察御史。遷工部侍郎。明年。轉朝請大夫。大司農丞。又明年。陞中奉大夫。大司農少卿。復入禮部爲尙書。十八年。參議中書省事。兼經筵官。次年。進通

奉大夫御史臺治書侍御史二十年。拜通奉大夫中書參知政事同知經筵事。提調四方獻言詳定使司。後四年。階陞資政大夫。俄除翰林學士承旨。榮祿大夫知制誥兼修國史。李羅帖木兒入相。出爲嶺北等處行中書省左丞。明年棄官居房山。二十八年閏七月。元順帝北奔。淮王帖木兒不花監國承制。復起爲翰林學士承旨。上章控辭。已而元亡。迨入國朝。召至南京。洪武二年。授以今官。三年。兼弘文館學士。是年冬。監察御史王著等劾公亡國之臣。不宜用。公坐免。詔出居和州。閱再歲而卒。公生四歲。其大父卽使公讀書。大父本黃氏子。來繼於危。知公能。亢危氏宗。督厲之尤切。年十五。卽通五經大旨。據坐爲人師。與同郡葛君將。曾君堅。黃君啤。葛君元哲。更相策警。窮日夜不休。復徒步走臨川。吳文正公澄。清江范文白公棹之門。質而正之。二公皆折行輩。與之爲禮。吳公至。恨相見之晚。凡所著書。多與公參訂之。虞文靖公集。孫先生轍名德俱尊。其遇之一如吳公。由是公之名震動江右間。出游金陵。或以其文示南臺中丞張文穆公起巖。張公以狀元爲顯官。少所稱許。獨推服公曰。危君爲狀元。庶幾相當。老夫有愧色矣。張公入朝。遂挾公以行。達官貴人慕公聲華。爭欲出其門下。更相論薦。惟恐失之。公之檢討經筵也。經筵一月。進講者三。講文皆屬公手。公嘗敷釋民惟邦本之言。以進。典領臣惡其峭直難之。公曰。經筵之職。所以格君心。反不以民之疾苦告邪。縱加罪。罪在操觚者。素請當之。卒以進講。順帝大悅。詔賜經筵官酒。公不飲。復賜馬。漚一革囊。金織文幣人一端。皆有副。已而有詔下中書。發錢粟千萬。賑河南永平民萬口。咸曰。活我者。經筵官也。公復移書執政。請修宋遼金三史。乘傳行宋兩都。訪摭闕遺。書成。公之力居多。順帝知公問學。

淵深特命註爾雅。較君臣政要。公悉心而爲之。不數月而成。及進。賜金若干。公辭曰。臣職也。何勞而受賜。不敢奉詔。尋有宮人之賜。公復辭曰。臣有糟糠之妻。在大江之南。無所用之。亦不受。其助教成均也。六館生擇所疑。羣揖難公。公片言折之。悅而去。分監上京。輟餐錢。建監門。葺齋舍。勒開國以來分教師之名於石。尚書王某致政。居蔚州。構暖泉書院。請類於朝。他監官以地無先賢故事。不從。公聽其立師。以訓士子。順帝以公善筆劄。詔書釋氏書。公辭曰。臣官冑監。以教化民彝爲職。外教之典。不宜書。無已。遷他官。乃可耳。遂止。其授經宮學也。受業生皆貴戚大臣子。橫肆不率度。公創教條。置帳歷。日書其勤惰。月會而賞罰之。皆畏服不敢犯。其復應奉翰林也。會修后妃功臣傳。事多亡逸。無據。公買錫餅饋宦寺戚里。歷歷叩之。復參覆得實。乃始筆之。卒爲全史。其在太常也。請親祀南郊。築北郊。以斥合祭之非。謹謚法。嚴祀典。以祛謬妄。時翰林承旨張公翥爲博士。禮文有闕者。同補正之。人稱爲雙壁。其爲國子監丞也。捐束脩。餽小學書。及夏小正經傳。考於梓。以惠學者。其居兵部也。奉詔墾田於雄霸二州。相地受略。蕪除荆棘。闢田幾千萬畝。使民有道。民德之。其陞禮部也。與許文正公衡之孫克學俱贊皇太子受玉冊。故事。皇太子謁廟。用牲醴。百官以朝服賀於東宮。公謂克學曰。儻有違禮。人惟責吾二人。盍正之。遂徹牲醴。而以便服賀。其擢御史也。知無不言。御史觀音保等四人以諫死。英宗朝。公請錄其後官之。四川行省平章政事囊加歹。天歷初。舉兵。欲劫戴明宗。燕帖木兒伯顏等搆殺之。公力爲雪其冤。容城民魏敬益買田千畝。後見鬻田者二十家。不能自生。以田券還之。公請旌其門。以敦廉讓。其在工部也。順帝欲以蒙古書譯釋氏三藏經。下

部刊行。公以無益。諫罷之。執政居第。與燒飯橋近。有司希其意。欲鑿石易橋。公諍止之。降香祀嶽瀆。故用金十兩爲香函。吏利金以銅半雜之。或造銅函易金。公廉其狀。皆執論誅之。淮南兵亂。公奉旨廉問其故。會維揚京口歲饑。民欲相食。公便宜諭守臣。發楮幣數萬定賑之。所全活者甚衆。上淮西宣慰司。余闕捍賊功狀。請陞其官秩。復請立宋徐節孝書院於淮安。其官大司農也。分治京南保定之境。幾無曠土。時海輸不至。軍國多仰焉。新城民田氏聽後妻讒。殺其子。公憤之。職旣不可治。乃爲文祭其子。民悔愧。後妻逃去。人搖手相戒。不用婦言。其長禮部也。時亂將亟。公憂之。每陳得失無隱。丞相賀惟一曰。君向寡言。今又何多也。公曰。時危恩重。情豈能默默。吾不敢畏丞相。但畏後世史官耳。其參議中書也。論天下事。以擇將帥舉賢才爲本。請專任甘肅行省平章定住。總西方兵。勿遣其迎帝師。悞軍事。用樞密副使普顏不花爲中書參政。經略江南。以也先帖木兒黃常爲禮部尙書。頒歷安南。立兵農宜撫使司。以安畿內。任賢守令。以撫流竄之民。順帝欲以公兼兵農宜撫使。公以疎遠辭。且諫曰。今日之事。宜臥薪嘗膽。以圖中興可也。公言雖愈加切。時不能盡用。舊制銓曹有行止。科吏主之。日具內外官十名上中書。中書籍以遷擢。其後吏怠不爲意。仕者淹滯。有待選十餘年者。公責吏日具五名。五日一上中書。吏樂易集。各思奉職。而久滯者獲伸。高原富民劉強。通其子婦。婦訴官。達刑部。吏受賕。欲變其獄。以俟赦。公以事關倫理。趣如法論之。其轉侍御史也。亂兵殺易州達魯花赤。公請假守令。以制兵之權。會中書左丞成遵而下。以賊得罪。獨賀丞相幹鑾平章與公不與。皇太子書澄清忠義清白傳家八字。以褒賜之。其參知政事也。刑部尙書朵列

圖兼與和路總管。與守將有隙。守將誣其欲私發官困糧。廷議杖踰百。免其官。公驗無發封狀。釋不問。都事倪晦與劉哈刺不花同官。丞相太不花莫府數以公事忿爭。劉怒。欲中晦。陰結監察御史劉君楚。俾擠之。會晦至燕都。囊故人所寄買馬白金。君楚攜其囊。得金。下晦獄。令自伏爲賊。狀上中書。公疑。亟爲白出之。馬德守德州。俘所獲南軍千戶楊甲。至都。將斬之。公召問狀。乃淮安世襲千戶。戰敗。陷濟南。羣盜中陳柔。俾詣德軍饋物。德械送之。非賊也。公白宰相釋之。楊感泣曰。參政生我。枯骨中。惠大無以報。然參政長者。爲公法釋我。我不敢私謝。期以忠義報可也。卒。與逆臣李羅帖木兒戰。死之。太醫院經歷徐某。藏盜賊盜敗。徐就鞫。案已具。要官庇徐。屬公從末減。使三返。公竟不許。嶺北行省參政董復初。素有廉名。同省臣飛書言其在稱海宣慰司時。取官中米千石。公疑其事。遣使覈覆之。果得其誣。李羅帖木兒。廓擴帖木爾。俱以平章總兵河南。漸生釁端。公謂御史大夫普化曰。養虎者欲其不相搏噬。則別其牢。今欲二人無鬪。莫若加其職而分地處之。用李羅帖木兒爲丞相治四川。以廓擴帖木爾爲丞相治河南。各責其成功可也。大夫曷不爲上言之。普化如公言。順帝及皇太子咸以爲然。會丞相搠思監喪妻不出。事中寢。初。江南經略使普顏不花。李國鳳。請封徽國。朱文公爲齊國公。以龜山楊公豫。章羅公延平。李公西山。真公九峯。蔡公從祀於孔子廟廷。公爲御史時。亦請封諡。劉賈。事上中書。皆寢不報。至是。公皆舉行。復爲文以少牢躬祭墳墓。禮部員外郎姜碩。使僞漢陳友諒。不屈而死。公爲奏官其子。京畿歉。國用不足。公奉旨以錢幣。誥勅募民入粟。公以義諭民。聞者感動。荷負來輸者填道。至有不願給直者。上都宮殿火。順帝勅重建大

安睿思二閣。公上書諫曰：苟以二閣爲祖宗所建，四海九州，獨非祖宗之物乎？會皇太子大臣亦以爲言，遂罷其役。其承旨翰林也。翰林修史有司日奉餐錢，方爲之，否則斂手而坐。公謂同列曰：吾等以史爲職，且祿已厚矣。奚俟餐錢而後爲邪？因次第修之。其以左丞居嶺北也。和寧爲太祖肇基之地，而無圖志可徵。公請於朝，作和寧志。先是夏侯尙玄嘗伏闕上疏，言鄭王某之寃，公高其義，補其子爲宣使。時楚速達兒爲胤平章，挾私憾殺右丞答里麻巴。公曰：是尙可以仕邪？不去。禍且及，卽上章辨。答里麻巴無罪，辭官去。居房山，臥不起。將相重臣皆以書請，不聽。丞相史列門來問計，公曰：撫軍院誤國至斯，不可救矣。亟請河南王廓擴帖木爾總兵以衛畿甸，而固守之。當時事勢已不可爲，及再任翰林，僅一日，而大兵入燕。公曰：國家遇我至矣。國亡，吾敢不死。趨所居報恩寺，脫帽井傍，兩手據井口，俯身將就沈。寺僧大梓與番陽徐彥禮大呼曰：公毋死，公毋死。公不食祿四年矣，非居位比。且國史非公莫知，公死，是死國之史也。力挽起之。已而兵入府藏，垂及史庫。公言於鎮撫吳勉，輦而出之。由是累朝實錄無遺闕者。公之力也。其入國朝也，皇上嘗訪以元興亡之故，甚見禮重。俾之侍講禁林。宋穆陵顛骨爲楊璉真珈所發，後入宣政院。西番僧相傳授爲祭器。公言於上，索取瘞之聚寶山。時公春秋已高，雅志亦不復仕矣。公厚重，深中有容，寡言笑。聞人詆毀如不知，與人交有禮。雖貴顯，恆若貧賤時。平生好薦賢，先後所引若翰林學士劉君獻、待制黃君暉等七十餘人。至通顯者甚衆。累持文衡，考試多士。人服其公樂善好施。若有督之者，凡事有關於名教，可以勵風俗者，必爲之。乃已。居官清慎節儉，遇凶歲輒疏食，不御酒食。倉吏進祿米贏七斗，時斗

可易白金五兩。公命歸之官。奉勅書徽政院使禿滿達兒神道碑。其從子以白金五十兩爲壽。公卻之曰。國體當爾。居中書。凡請文來謝者。皆不受。故人妻子不能衣食者。厚賙而生之。叔嘗請仕。公曰。賢才未進。吾敢私爾乎。能以德報怨。參政燕人杜翺。以公南士。欲搆公罪。翺死金陵。公爲文祭之。公博學善文辭。至正中。獨以文鳴天下。凡朝廷制作。皆自公出。四方欲顯白先德者。皆造公門。尤精於書。得片楮隻字者。寶祕以爲榮。有文集五十篇。奏議二卷。宋史稿五十卷。元史稿若干篇。藏於家。公娶舒氏。先三十年卒。再娶趙氏。先十一日卒。俱封楚國夫人。子男子二人。叔中至正二十年進士第。累官承直郎。大都路同知。薊州事。今爲安慶府儒學教授。游登仕郎。大都路儒學提舉。亦前年卒。女六人。一適同邑曾侁。堅之子也。餘皆天孫二人。長太平天。次德童。公未仕時。館授貴谿張氏。張思伐杏樹。以闢家塾。有鬼夜叩寢門。告公曰。吾杏之精也。主人將伐。願參政生之。公卽造張力解而止。鬼致白金壺爲謝。公辭。及公爲參政。嘗以滿溢爲懼。後陞左丞。遂快快不樂云。嗚呼。天之於人。不能以俱全也久矣。或授之才而不假以位。或畀以位而不畀以時。此奇才偉德之士。常困而不施。而生民所以鮮蒙其休澤也。惟公以淵深之學。精純之文。嘗都顯要之地位。海內仰之。如祥雲景星。亦可謂有得於天矣。而逢時亂亡。不獲大展以死。豈不可哀乎。雖然。觀其所自著者。固足以不朽矣。銘曰。

二氣孕精。至文迺生。疑爲川嶽。煥爲日星。天地之文。因象以示。象默無言。非人莫著。往古百代。作者孔多。迄今有聞。其能幾何。元興朔方。氣瀉而龐。俊烈宏謨。震盪萬邦。積盛而彰。實在君子。維八十年。其績甚偉。

卓茲危公起大江西。與學醇辭。孰能與齊。在至正初。交薦而陞。敷釋聖經。以屬帝明。中原薦饑。黎首告病。公跪而言。民爲國命。同列畏聞。吐舌改容。當此衰嗟。曰維汝功。柱師成均。曠譬有相。化其荒囂。趨厥禮讓。貝葉之文。有詔俾書。非職所宜。正色控辭。或服豸冠。或爲宗伯。或居中臺。或參廟畫。孰寃弗雪。孰善弗褒。孰蠹孰莠。弗除弗薶。白之擢之。予之錫之。剔之殛之。扶而植之。彼何不思。多言是訾。曰匪其然。吾畏後世。南風泱泱。耆老淪亡。屹如丘山。以鎮四方。疆土日蹙。孰不震動。謂尙有公。恃以無恐。權奸肆威。盜秉國鈞。畏公有言。出爲藩臣。政亂無章。倚勢相戮。公駭而吁。吾胡可祿。微服宵趨。房山是居。庶士遑遑。如涉失梓。天兵北征。驅雷走霆。有耳莫掩。燕社已傾。公曰國亡。吾曷不死。公忍不死。以存國史。大明方隆。多士景從。有詔任公。侍講禁中。昔豈不仕。弗獲行道。時之可爲。公則既老。維古賢士。立德樹勳。苟有弗施。著之斯文。公文之純。太音玄酒。道則在茲。爵祿何有。孰高爲山。孰深爲淵。文之有傳。終古昭宣。

元故祕書少監揭君墓碑

有元盛時。荆楚之士。以文章名天下者。曰虞文靖公集。歐陽文公玄。范文白公棹。揭文安公傑。斯海內咸以姓稱之。而不敢名。其後三公皆死無繼者。獨文安冢子諱汝君。以文學仕順帝時。至國亡而後終。人謂揭氏有後。君字伯防。少敦樸苦學。同舍諸生已成誦。出嬉遊。君獨坐諷不休。夜爇薪以繼。必至精熟乃已。年十八。盡通六經大義。肄舉子業。試不合有司。既棄去。取諸子百氏書窮研之。攻古文辭。侍父入燕都。補太學生。端方有威儀。六館士敬憚之。或譁笑方殷。聞君履聲輒止。是時虞公及歐陽公皆在朝廷。交稱君

美以爲文安慶。至正□年。文安薨。天子錫金錢百僚。皆致賻。樞人勸君輸貨。縣官而給鹽。淮安可獲利數倍。且無遺路。虞君哭不從。曰。汝敢玷先君之喪乎。至家。援禮制儀。咸易兩至。服闋。以蔭補祕書郎。階承務郎。遷翰林國史院編脩官。轉太常博士。再入翰林。爲修撰。仍兼國史編修。階三轉。至奉議大夫。代祀北嶽北鎮。還拜江南行臺監察御史。未上。留爲禮部員外郎。階朝列大夫。十八年。奉詔諭江西。至七閩。會僞漢陳友諒陷江西。不得往。改僉江西湖東道肅政廉訪司事。加朝散大夫。治建寧。旣而友諒兵寇杉關。下邵武。據延平。建寧受圍。大軍退保福州。域中吏民相繼出奔。惟經略使普顏不花尙在。君詣與之謀。經略聞君至。迎曰。僉事猶未行耶。君憤曰。經略何爲發此言。今盜賊圍孤城。正吾與經略致死時也。吾死將與此城俱。願獨走。欲安之乎。經略起問計。君爲之畫策。經略驩曰。吾志決矣。卽當如君言。剖散卒得千人。命建寧總管阮德柔將之。出戰不利。民大讐。君集衆告以禍福。謂并力禦賊。則妻子可生。緩將爲俘。擄語甚切。民感泣。請各自效。無老少。悉乘城固守。君往來撫勞之。分壯者千人。助德柔。戰屢捷。勢稍張。城外有山曰黃華。高出城上。君恐賊窺見虛實。作層樓蔽之。命守者鍛鐵爲長鉤。廣儲水樓下。以俟。衆不知所爲。及賊據山。以火攻樓。卽以長鉤曳之。隨灌以水。火尋熄。復預積濕薪。枯蘖。城下賊穿隧以入。燎烟於隧。熏之死。者甚衆。賊揚言攻城西。君察其旗亂而氣怠。命備城東。已而果攻城東。知有備。驚駭而退。是時內外相持逾十旬。樵蘇道絕。徹民居以炊。經略憂以問君。君曰。士氣在乎作之爾。且直壯曲老。吾以王師討賊。何憂不勝。乃槌牛釃酒。勞將士。以義激之。皆踴躍請戰。空一城鼓譟助之。聲如雷霆。賊衆數萬逆戰。君戎服出。

陣後督諸將盡力。俄矢石亂下。或請少避其鋒。君叱曰。破賊在今日。敢言退者斬。於是士卒殊死鬪。自寅至午。焚其三柵。乘勝奔之。是日福州援兵繼至。賊敗走。復延平等三州。獲勝兵千餘人。咸欲繫獄。論其叛逆罪。君曰。大盜未殄。脅從者可勝誅耶。誅桀黠者數人。悉縱之。耕及諸將上功於朝。被褒擢。君未嘗出口。或爲君冤。君曰。吾職耳。可徵功乎。改江西行省郎中。未赴。以工部郎中召。時淮浙亂。道不通。留家四明之慈溪。挾子樞浮海而北。過黑水。抵鐵山。卒遇倭寇。同行多被害。君脫走。趨遼東。轉之山東。制下陞祕書少監。階中順大夫。而齊國忠襄察罕帖木兒在洛。遣使迓君。君赴洛。留歲餘。承制授刑部侍郎。不就。二十八年。踰太行至燕都。未久。大明兵圍城。七日十八日。順帝宵遁。明日。君覺之。遑遑北走。樞失君所在。號哭而追。及於海子橋。君罵曰。吾死職義也。爾來欲何爲。奮然行。弗顧。樞泣抱持。賓客故人亦稍至。遂強挽君歸。環立守之。君擁衾臥不食。樞叩頭流血。請所親厚者交進慰解。乃起食一餐。八月二日。兵入燕。凡仕者例從南京。君至。稱疾弗仕。踰年。反慈溪。洪武六年二月八日。卒於寓舍。年七十四。四月一日。權厝舍西香蘇山之原。以某年月日葬某地。君事繼母以孝聞。撫庶弟有恩。六主文衡。所得多奇士。交友皆當世名人。爲文敦深簡質。有父風。務關倫教。不爲浮豔語。集毀於兵。存者若干卷。藏於家。君自視欲然。接人和而有禮。寡言峻行。未嘗有矜大之色。雖家人不見其疾言厲氣。平居非疾病必冠帶。爲私書皆端謹可觀。初君之曾祖。贈嘉議大夫禮部尙書上輕車都尉。追封豫章郡侯。惟聰。祖。贈中奉大夫江西等處行中書省參知政事。護軍。追封豫章郡公。諡貞文。文成世居豐城。皆以厚德稱。至文安。遂以布衣致位翰林侍講學士。中順

大夫知制誥同修國史同知經筵事。追封豫章郡公。而推恩及於二代。郡侯之配黃氏。何氏。郡公之嬪黃氏。文安之室李氏。程氏。皆封豫章郡夫人。君起其後。又能世其家。有聞於時。而君之子樞。樂復好學問。不失儒行。當可繼於君。嗚呼。爵祿之繼。可幸致也。而繼其文學爲難。文學可勉而修也。而繼其道德爲難。若君者。可謂兼之矣。君娶會吳。易三氏。曾先卒。吳。易二氏皆封靖安郡君。子男四人。棗。丑。天。其二卽樞。樂三女。適盛伯剛某。君之居慈溪。與今晉王傅桂君彥良交。君卒。彥良持樞狀來。速銘。銘曰。

自古有國。貴惟世臣。匪爵之仍。有德有文。朔元百年。中有揭氏。位雖弗崇。其德可持。揭氏之先。豈無侯王。盛莫與紀。靡久卒亡。維文安公。敦厚凝確。際時休明。典帝制作。德尊望隆。震撼四方。執造化機。闔陰闢陽。人止其身。公又有子。緝其休聲。克闡克似。豈惟文辭。亦有事功。建略南藩。剪屠姦兇。仗義爲城。奮作士氣。章甫申申。復地千里。褒寵之加。非我敢知。勞烈雖多。乃職之宜。邦國殄喪。吾能獨存。奉身以歸。敢污先君。生旣有聞。歿則有承。凡時之人。其誰與京。天匪私君。以彰世德。德著穹碑。來者咸式。

故筠西吳府君墓碑

洪武二年冬十月二十有五日。筠西府君以一疾不起。聞壽年雖八十有八。其州里之人更相弔哭。以爲義士亡矣。吾屬將何所依賴。十數里中。聲嗚嗚不絕。四年春正月六日。葬於孝義里戈溪之源。其孫鑑以濂知府君最深。請張君辰件右功世取文刻碑。文曰。府君字長卿。諱宗元。號筠西。其氏曰吳。吳出秦伯苗裔。初遷會稽之山陰。唐大中間。有諱翥者。以學行聞。門人私諡文簡先生。先生遠孫少邽。咸通初。復遷諸

暨開化鄉之峽上少邾九世孫泗宋崇寧中復由峽上遷孝義里世有顯人其詳具見譜圖記曾祖蘭祖元祐父護母斯氏府君馮出也孕二十四月而生幼發智如成人早喪父事母夫人甚恭黎明至寢所候起居躬進膳羞必待竟食乃退母常戒之曰我有媵侍自足備給使勿勞苦我兒也府君頓首謝及母有疾府君遑遑不自寧夜參半泣禱上下神祇願以身代久弗驗府君心益苦一夕母夢白衣人謂曰汝壽止於斯今以汝子之孝特延一紀疾果瘳忽都魯忽公宣慰浙東聞君之孝辟爲奏差受事僅數月嘆曰我母年已耄苟力田以爲養不翅足矣何以仕爲竟拂衣而歸日在親側視其顏色爲進退歷十二年母以高壽終府君號慟幾致隕絕服闋雖已久但語及之輒哽咽流涕如新喪見者憫之府君自念父母歿唯教子孫毋析居乃可以繼先志聞浦陽鄭順卿家十世同爨特往謁焉順卿示以家範數千言府君如獲寶璐而歸力遵行之十有餘年家政蔚然可觀戶庭之間穆如春風人無間言者和氣所感有犬病足其子啣食哺之犬得不死文人競爲詩歌美之府君益堅爲善之志製家教一篇誨飭剴切洪纖無不及而惠利鄰族之事居多召子孫示之曰天之畀於吾者厚矣脫有餘財可坐視顛連而弗之卹乎吾就地之日近故惓惓爲爾輩言之府君晚年耳益聰目益明健步如強年人及見玄孫之生士君子咸集府君危坐中堂一子康髮盡白帥諸孫曾鴈驚行以進次第舉觴爲壽府君抱玄孫真膝上銜杯盡歡蒼顏酡暈望之者謂爲神仙中人繪史遂爲高玄聚慶圖以傳後三年府君遭奇疾陽道閉澀不復能小遺醫者云病在陰氣絕藥不能及法當噏而通之其孫曰鉅者遵如醫言僅得汚血一勺終不治府君度疾不可

爲呼家人與訣。以義居不分爲屬。其耿耿猶前志云。府君娶陳錢二氏。皆先卒。繼楊氏。後府君亦卒。子男子二。長庸。先卒。次卽康。子女子一。適同里斯文。孫男四。鏗。鉞。鉅。孫女一。花亭。黃鏞。其壻也。曾孫男十。源。澗。濤。海。汝。澗。治。瀚。渡。淇。曾孫女二。在室。玄孫男。櫛。梓。桷。植。府君性恬沖。與物亡忤。貌熙熙。常如春。未嘗少見憂戚之容。頗嗜音樂。自造短簫。長可六七寸。遇風日清美。輒箕踞而吹之。聲振林木。而胸中之自信者。一假是以洩之。故當時之賢者。多樂與之遊。且惜其不沾一命之祿。以展所蘊。終無以暴白於世。然而生受備物之養。歿則期功。總麻。千指就位而祭。雖古之封君。亦不過此。尙奚憾哉。濂也不敏。頗嘗獲拜床下。與聞緒論。及東出逃難。又蒙授館。致餼。如忘年交。府君今不可觀矣。俯仰今古。惡得無情乎。於是掇其大者而製銘曰。

有夫之羸如。發行之真如。家聞之馨如。條教惟程。孰得而京如。影端如形。孰得而傾如。蟄如繩如。彙如烝如。將歷世而弘如。

